

萬有文庫

第一集一第


王雲五編

明史紀事本末

(九)

谷應泰著

商務印書館發行



明史紀事本末

(九)

谷應泰著

國學基本叢書

萬有文庫

第一集一子種

總編纂者

王雲五

商務印書館發行

# 明史紀事本末

## 卷五十九

### 庚戌之變

嘉靖二十九年夏六月。俺答寇大同境。潰牆入。悉精兵伏溝壑中。而以老弱百騎往來爲餌。偵騎信之。報總兵張達。達素以果銳敢入。至大將。意輕之。合兵。兵未合。而遽率麾下馳擊之。伏發。圍達數匝。馬蹶。遂見殺。副帥林椿聞達被圍。不介馬而馳救。達不克。亦死之。達椿皆驍勇善戰。俺答得二將首。輒引去。事聞。逮總督侍郎郭宗皋。巡撫都御史陳耀。下獄。耀杖死。宗皋謫戍遼左。贈達左都督。椿都督同知。賜祀立祠。春秋祀之。八月。俺答入薊州塞。初。張達敗沒。乃起復翁萬達代郭宗皋總督。趙錦代陳耀巡撫。以仇鸞爲宣大總兵。萬達家居未至。命侍郎蘇佑攝其事。佑抵鎮。卽上疏請益兵食。未報。而俺答狼台吉復擁衆窺大同。初。仇鸞坐廢。居京師邸。以賄嚴世蕃得總兵宣大。至是。惶懼無策。斯養時義侯榮者說鸞曰。主勿憂。吾爲主解之。乃爲鸞持重賂俺答。令移寇他寨。勿犯大同。俺答受貨幣。遺之箭囊以爲信。而與之盟。遂東去。諜者復白敵中語。欲寇宣府東。遼左西。兵部尙書丁汝夔謂帝厭警報不悉。以聞。但申飭薊州撫鎮使嚴備。已而警報漸甚。乃發諸邊兵萬二千騎。京營兵二萬四千騎。分布宣薊諸關隘。邊兵取符驗。期會未卽至。而京兵悉市井傭保子。識者知其必敗。秋八月乙亥。俺答帥部下至古北口。以數千騎攻牆。都御史王汝孝悉衆出火礮。矢石下攻之。俺答乃佯督兵綴薊師。而別遣精騎從間道黃榆溝潰牆出師後。

京兵大驚。潰爭棄甲及馬。竄山谷林莽中。寇遂大殺掠。懷柔順義吏士無算。長驅入內地。巡按順天御史王忬聞報。度兵弱無能禦者。夜草疏言敵兵標悍若風雨。而古北口距京師僅十舍。漫衍無衛戍。瞭望神京。陵寢萬一蕩搖。事係非小。請速集廷臣議戰守策。而身出駐通州。召吏民給仗聽約束。收漕舟艤潞河西。勿使爲敵用。甫畢。而夜半敵兵果至。營河東二十里孤山。汝口諸處。忬復爲疏緹城。使使來京師請援。京師震恐。急集諸營兵。城守少壯者已悉出邊墩。敗喪僅餘四五萬人。而老弱半之。又半役總兵提督太監家。不令出伍。倉卒從武庫索甲仗。武庫闕。又援例需價。不時發。久之不能軍。丁汝夔乃以聞。帝大驚。詔吏部左侍郎王邦瑞。定西侯蔣傅。提督九門文武大臣各十三人守一門。又別遣都御史商大節。督科道官募民間材力者蒼頭義軍垂四萬。及坊甲保伍分置諸門。睥睨間。集天下應武試者千餘人。分從諸大臣策應。檄召諸鎮兵勤王。時寇騎逼通州數日。前阻水未能渡。王忬日夜乘城守。不能支。連告急。詔遣都御史王儀注援。己卯。咸甯侯仇鸞得勤王檄。以大同兵二萬入援。先是寇既東行。時義侯榮謂鸞曰。賊騎東。公宜自請入。可以爲功。而上結於天子。鸞悅。即伴奏臣偵賊東犯薊鎮。誠恐京師震驚。請以便宜應援。或隨賊搏戰。或徑趨居庸爲防守。帝壯之。詔留駐居庸關。聞警入援。而俺答果由薊鎮攻古北口。入犯京師。帝益信鸞。詔入援。鸞副總兵徐珣。游擊張騰等率兵馳至。陳通州河西。帝大喜。時保定都御史楊守謙以五千騎至。延綏副將朱楫以三千騎至。人心稍安。已而河間宣府山西遼陽諸將各以兵先後至。凡七鎮。五萬餘人。帝內視稍強。各賜璽書褒獎。予金帛。令躡賊。而拜咸甯侯仇鸞爲大將軍。諸道兵悉屬焉。賜襲衣。玉韉上尊及千金。又賜封記文曰。朕所重。唯卿一人。得密啓奏進。以楊守謙爲兵部左侍郎。總

督各路戎務衛京師。都督陸炳提督皇城諸門。譏察不虞。都御史商大節督巡五城。防內釁。太子太保禮部尚書徐階奏釋故參將戴綸。歐陽安等繫。令從軍自效。分遣京營諸將營於城內外各巷陌間。京營兵素未見敵。驅之出。不敢前。城外及近地居民擁入。連日夜不絕。多被血淋漓。至者。都督陸炳請出太倉米。減直。濟流徙老弱。俱報可。時變起倉卒。諸務未備。勤王師各輕騎馳至。未費糗糧。制下。犒師牛酒。諸費皆不知所出。戶部文移往復二三日。軍士始得數餅餌。開庾發粟。則囊釜餽皆無所需。故士卒饑疲。都督陸炳言。戶部臣失預計。軍興糧餽不支。士多餒死。帝怒。奪尚書李士翱以下諸官職。戴罪辦事。俺答兵自白河東渡。潞水西北行。大掠村落。居民焚燒廬舍。火日夜不絕。郊民扶集門下。門閉不得入。號痛之聲。徹於西內。帝命啓而納之。是日。俺答掠婦女。大飲演武堂上。遊騎往返六門外。仇鸞率勤王諸兵不敢擊。時遣義榮與之通。許買市以自安。辛巳。至東直門。執御厩內八人。以去。不殺。縛之。見俺答踞坐氈帳中。謂曰。若歸見天子。好爲我致書。自解送歸。見帝。啓書多嫚語。求入貢。壬午。帝召大學士嚴嵩。李本。尚書徐階。對於西苑。出書示之。曰。何以應之。嵩曰。此禮部事。階曰。事雖在臣。唯上主之。帝曰。正宜商議。階曰。寇駐兵近郊。而我戰守之策。一無所有。宜權許以款。第恐將來要求無厭耳。帝曰。苟利社稷。皮幣珠玉。皆非所愛。階曰。止於皮幣珠玉。則可。萬一有不能從。將奈何。帝竦然曰。卿可謂遠慮。階因請以計款之。言其書皆漢文難信。且無臨城脅貢之禮。可令退出大邊外。別遣使齎番文。因大同守臣爲奏。事乃可從。往返間四方援兵計皆可至。我之戰守有備矣。帝曰。卿言是。命出集廷臣議。日午。羣臣畢集。階出俺答書言。欲以三千人入貢。許之。則緩兵。否則益兵。破京師。羣臣相顧莫敢發。因陳筆劄。令各書所見。奏請上裁。國子司業趙

貞吉抗言曰。此不必問。問則奸邪之臣必有以和說進者。萬一許貢。則彼必入城。三千之衆。恐烏蠻驛中莫之客也。且彼肆深入。內外夾攻。何以禦之。不幾震驚宮闕乎。不務驅逐。而畏其恐喝。迫而許之。何異城下盟。檢討毛起謂時事孔棘。宜暫許之。邀使出塞。而後拒之。貞吉力叱起。羣臣俱難之。奏入。乃止。是夕。火光燭天。德勝。安定。門北人。居皆燬。上在西內。大震懼。聞中官稍稍道貞吉語。乃馳使召入。對給筆札。命疏所欲言。貞吉上言。陛下宜御奉天門。下詔罪己。追獎故都督周尙文之功。以勵邊帥。釋給事沈束於獄。以開言路。輕損軍之令。重賞功之格。飭文武百司。共爲城守。遣官宣諭諸營兵。使力戰。且士不力戰。以主將多冒首功。今誠得首功一。卽予金百。捐金不十萬。賊且盡矣。帝壯之。擢貞吉爲左春坊左諭德。兼河南道監察御史。稱詔齋五萬金。宣諭行營將士。通政使樊深條禦寇七事。中言仇鸞未聞一戰。非士不用命。卽主將養寇要功。乞密遣近侍詰狀書奏。上大怒。黜爲民。癸未。寇由鞏華城犯諸陵。轉掠西山良鄉以西。保定皆震。時帝久不視朝。吏部尙書夏邦謨疏言人情洶洶。非上躬御正朝。延見廷臣。不足以塞天下望。振威武。許之。是日。文武大臣具服待命闕下。晡時。帝始出御奉天殿。降敕切責諸大臣。還宮。羣臣就午門跪聽宣敕。皆惴惴計有處分。迨散門。且下鍵矣。乃敕遣官校逮繫駐守通州都御史王儀。巡撫薊遼都御史王汝孝。及薊州總兵羅希韓詣京。卽訊。已而儀至下獄。以畏懦不戰削籍去。汝孝以道梗不及逮。初儀至通州。命營兵屯戍城外。而身閉閣臥城中。會仇鸞引兵至。敵少。卻鸞兵往掠食諸村落。儀發兵捕執下獄。死者十數人。鸞兵大譁。欲甘心儀。時巡廢御史上其狀。帝怒。故逮治之。尋以巡按御史王忬爲僉都御史。代儀守通州。甲午。執兵部尙書丁汝夔。及左侍郎楊守謙。下詔獄。初。寇逼通州。汝夔聞警。束手無措。

遣募哨敵虛實者出城。不十數里。道遇扶傷者。輒奔還。妄言見敵某所。城中輒震。已而言不信。汝夔不加罰。復募他卒偵之。如故。城中數震。而成國公朱希忠理京營。兵多役占。行伍不足。恐兵少見且獲罪。乃東西調掣爲掩飾計。士疲不得息。多出恚語。而莫曉誰調。爭詈汝夔。欲魚肉之。語稍聞禁中。時宣府延綏遼陽山西援兵悉集。糜餉不能給。兵饑怨望。仇鸞大同軍尤無律。往往椎髻劫掠村落中。時被連獲。或自詭爲遼陽軍。遼陽軍者。朵顏諸部也。先是有傳賊中語遼陽實導我來者。故京師訛言遼陽軍叛。而鸞方被寵遇。雖獲大同行掠者。有司不敢置之理。必以聞。帝謂大同軍首入援。行掠亦出饑疲。令付鸞自處。鸞復置不聞。汝夔不得已。乃下令勿捕大同軍。大同軍益無忌。民苦之甚於賊。大同軍既自詭爲遼陽。民間不知。遂謂汝夔山東人。以鄉曲故庇遼陽叛軍。及寇薄城下。汝夔益惶急。恐喪師。令諸將勿輕戰。諸軍故懼。不敢戰。皆謗言汝夔禁不發。民間益歸罪汝夔。而鸞機譎。謀於大學士嵩。嵩謂敗於邊可隱。敗於郊不可隱。飽將自去。惟堅壁爲上策。鸞數稱率兵往擊賊。賊實在城下。顧遠屯郊外。不敢近。城中莫知鸞擊與否。鸞得死賊首六級。奪馬十餘。詐謂戰得之。守謙被命屯城下。又以兵少。故不敢一擊賊。帝聞之。益謂鸞遠出禦敵。而守謙畏懦不出師。與汝夔并切責之。諸中貴園墅在城外。又多所殘毀。爭泣訴帝前。謂守謙。汝夔貳於賊。帝時從高望城外。火已心恚。諸治兵者。聞是。益奮怒。不誅一大臣。亡以懲。乃捕汝夔下詔獄。就廷訊。使使自軍前逮守謙入。下法司議罪以聞。命王邦瑞攝兵部。艾希淳代將守謙兵。於是刑部侍郎彭黯。左都御史屠喬。大理寺少卿沈良才等論汝夔守謙罪當斬。而爰書冗長。錄不速竟。帝坐齋宮。趣獄具不得。謂黯等比周。將有所規免。俱逮繫獄。各廷杖有差。汝夔守謙俱棄市。流其妻三千里。外子戍鐵



嶺衛。謫左諭德趙貞吉荔浦縣典史。初，貞吉廷議罷盛氣謁嚴嵩於西苑直房，嵩不見。貞吉怒，叱門者。通政趙文華趨入，顧曰：「公休矣。」天下事當徐議之。貞吉怒曰：「權門犬，何知天下事？」嵩聞大恨，乃佯薦貞吉出城。賈銀勞軍，方北騎充斥，徵發旁午，戶工二部官皆得罪。犒銀不時發，諸軍分屯城外。貞吉僦民車致銀，仇鸞所鸞不受，敵騎已稍遠。貞吉計無所出，賈救巡城外，徧給諸營，而還復命。嵩謂貞吉狂誕，追論其申理周尙文、沈束非是，下獄杖九十，有是謫。己卯，俺答引而西，前後所掠男女贏畜金帛財物既滿志，捆載去。欲西奪白羊口，出塞而留餘衆京師外，以爲疑兵。諸道兵悉屬大將軍，凡十餘萬騎，相視莫敢前發一矢。俺答至白羊口，守將阨險，餽不得出，稍棄牛羊婦女等，復擁衆東南行。至昌平北，猝與鸞兵遇，鸞出不意，倉卒幾不能軍。敵縱騎蹂陣而入，殺傷千餘人。幾獲鸞，以裨將戴綸徐仁力救，僅以身免。乃更取平民首上之，自以爲功。寇騎遂長驅至天壽山，總兵趙國忠列陣紅門前，不敢入。奪道循潮河川，由古北口故道出。京師戒嚴。九月辛卯朔，俺答悉衆出塞，疲甚。又顧戀鞬重不能軍，諸將故怯，兼白羊之敗，愈不敢逼。徐尾其後，至石匣城及張家古北等口外而還。其前後禦敵有功者，大同游擊王祿戰懷來，斬十七級，獲馬十二匹。山西游擊柴紹戰昌平，奪還男婦二百四十二人。都督仇聚戰海店，生擒四人。旣而鸞報功八十餘級，以捷聞。帝優詔慰鸞，加太保，賜金幣。遣戶部侍郎駱顯賑被寇諸郡縣，掩骼埋瘞，慰集瘡痍。罷京營提督太監高忠，成國公朱希忠，遂安伯陳鏞。改十二團營爲三大營，曰五軍，曰神樞，曰神機。總三營曰戎政府，以咸甯侯仇鸞入理之，爲製印章，重其任。以王邦瑞協理戎政，爲鸞副。邦瑞奏用兵部主事二人，給事中御史各一人，議論多悟鸞。主事申燧復持法不爲屈。疏京營弊政，乞蠶革之。鸞怒，密

陷燧出補外。乃言京營用給事中、御史不便，皆革之。置薊遼總督大臣，以薊州、保定、遼東三鎮隸焉。改孫檜爲兵部侍郎，總督薊遼。未幾，以何棟代之。冬十月，募諸道兵入衛京師。山東、山西、河南諸府歲集京師，練備秋防。秋後復散去，以是爲常。如踐更卒例，復選各邊鎮銳卒入衛京師，以京營將分邊遊兵，從咸甯侯鸞之請也。兵部覆言：二鎮京師之門戶，禦寇者不於門戶，而與之格鬪於堂奧之間，鮮不危矣。帝不聽，第免二鎮卒不預徵，於是各邊共選六萬八千餘人。班上京師，與京營兵雜練之。塞上有警，邊將不得徵集，而京師在邊者不任邊責，恣意腴削自營，人人自危矣。仇鸞請駐師宣大間，整飭兵甲。俟冬月大舉，以紓華夏之氣。乃班師入衛，以備秋防。帝嘉之，命兵部會官集議。兵部左侍郎史道、戶部尚書孫應奎、工部尚書胡松等上議曰：俺答犯順，深入郊圻，震驚陵寢。荼毒元元，罪在不赦。皇上深懷大計，欲興問罪之師，而復有敵愾禦侮如鸞者，身任其事。臣等僉謀，俱如鸞議。卽今整齊士馬，臣道等之職，預儲軍餉。臣應奎等之職，利精器械。臣松等之職，帝悅從之。十一月，仇鸞請易置三輔重臣，以大同總兵徐珏、易州以徐仁代守大同，而宣府、薊鎮總兵李鳳鳴，成勳互易其地。帝命兵部從之。於是王邦瑞上言：予奪朝廷之大權，命將者，天子之重柄。祖宗時，總兵正副官皆兵部會同府部大臣集議，每上一人，恭候裁定。所以慎重防杜其漸。示臣下不敢專也。今鸞坐名擬任，更易四將，則九邊握兵柄者，有不目屬心向，妄生覬覦者乎。皇上聖明，推心賢帥，何所不可。臣愚以爲國家典制，關係非輕。聖人舉動，萬世作則。臣待罪本兵，不敢不言。帝曰：戎政初修，忠賢是託。况朕有密咨，非鸞專權。爾兵部若隨事效忠，用無不當。不待更易，矧勞朕心邪。一籌未發，而攻毀之謀，國之忠固若是乎。復諭廷臣曰：昔吾太祖兵柄多委任諸大將，未

有作謗者。邦瑞以敵退未受加擢。故爲是言。是霍鵬之怨上也。夫破格舉事。而盡忠者。乃不能容。倘敵再至。其效汝變之誤國乎。邦瑞聞諭。莫知所措。仇鸞帥諸鎮兵出宣大。聲言擣巢。歷久不擊。乃稍出近塞。夜襲敵營。斬老弱數級。而還。鸞自劾無功。上不問。乃復請廣集兵糧。以明年大舉北征。命戶部遣使盡括南都及各省布政司貯積。且督歷年逋賦。時鸞恃寵作威福。所上疏。既自內批行之。不下兵部議。王邦瑞屢疏辯之。鸞擠之。遂落職去。禮部尙書徐階極言北征事難以成功。且後患有不可測。議乃稍寢。谷應泰曰。明制內立京營。外列邊戍。邊卒屯守要害。藩衛神京。京營羽翼王室。鎮撫中夏。有事不相徵調。無事不忘訓習。制甚周也。嘉靖時。坐營大帥。半出勳臣。教以耳貴。括讀奢書。兼以勃鞞制閫。魚朝觀軍戎。伍貔貅。入侯門之廝養。羽林組練。參中貴之蒼頭。游手市閭。不操寸刃。廁身兵籍。濫食數丁。於是京營一制。幾同贅瘤矣。庚戌之事。主邊兵者。仇鸞。主京兵者。丁汝夔也。逆鸞私盟俺答。賄路避兵。鄧牛私犒。用伐秦謀。晉馬入陳。故假虞道。韋弦苟息。果如是乎。汝夔選懦。素不知兵。驟聞邊警。悉遣禁卒。倉皇就道。莫知適從。而敵騎已蹂躪內地。王師外潰於潼關。烽火內達於甘泉矣。然後索虎旅於空營。求兵仗於武庫。楚軍不戰。皆化蟲沙。晉國先聲。愈搖風鶴。傳檄召募。命曰義軍。編列市人。驅之城堡。京營至此。尙可問乎。至於邊軍雲集九門。敵騎長驅都下。便當四面合擊。隻輪不反。而乃懷光便橋。屯兵不進。宏淵靈壁。搖扇清涼。楚兵皆屬冠軍。邯鄲全恃晉鄙。長戟不施。長轂不刺。邊軍亦復至此。國家武備。真無可恃矣。乃始親御午門。召問百官。時無樊噲。僅有終生。急散陳平之金。親叩亞夫之壘。宋義堅不渡河。魏將虛名救趙。惟有亟斬丁公。先除元振。奈何守謙無兵。而使戰。仇鸞不戰而陳俘。賞加元惡。戮出無名。當時俺答實無志中。

國縱掠而歸。不然。幸則奉天。梁州。變且晉愍。宋欽矣。前車既覆。後軫方逾。汝變出京兵以防邊。仇鸞召邊卒以實京。揚水之卒。圻父以卒召當誅。涇陽之兵。德宗又以未雨失算。殲罪酬功。國是全非。焦頭曲突。人謀兩誤。嗟乎。已無澶淵之智。尚思衛霍之功。上表出師。鸞欲誰欺乎。百官明知其詐。謬爲陳請。以道上譴。蓋世宗所惡者直言。而不必其忠。所喜者殺戮。而不必其當。朝有直言。則損其明。朝有殺戮。則損其威。究之。嵩本賄敗當禡。鸞已家居失職。必欲強予將相之位。成其亂賊之名。身誅族滅。爲世指笑。吾故曰。嚴嵩仇鸞。亦無死道。其死也。世宗殺之也。

## 卷六十

### 俺答封貢

世宗嘉靖八年冬十月。吉囊俺答寇榆林。甯夏塞。總督王瓊率兵禦卻之。初。小王子有三子。長阿爾倫。次阿著。次滿官。噴阿爾倫旣死。二子皆幼。阿著稱小王子。未幾死。衆立阿爾倫子卜赤。而阿著子二。曰吉囊。曰俺答。強甚。小王子雖稱君長。不相統攝也。吉囊分地河套。當關中。地肥饒。俺答分開原。上都。最貧。以故最喜爲寇。其後漸強盛。有騎十餘萬。遂雄於諸部。滿官。噴等八營皆服屬之。時時入寇。瓊乃請修沿邊垣。墉。起蘭。盡榆林三千餘里。十月。俺答寇大同。掠井坪。應朔。

九年夏五月。俺答犯甯夏。時俺答與小王子吉囊諸部或合或分。時時犯塞。至是。入甯夏。六月。入宣府。十年春三月。入大同。塞。秋九月。犯陝西。冬十月。犯大同。旋出松潘。犯西川。西境自是無歲不入寇。前後殺略。

吏民剽人畜以億萬計。

十九年七月，俺答諸部大舉犯宣府。先是大同歸正人王九子言北部哈刺噴、糾俺答、几祿、吉囊、青台吉、赤台吉等共十餘部，驕掠馬，負十日糗糒入塞。比報至，俺答已過聖順川，抵尉州。所過盡破關隘，殺人盈野。總兵白爵禦之，戰於水兒亭，敗績。總兵雲冒又敗績於連雲堡。俺答留宣府境內兩月始出塞。八月，朵顏革蘭台結吉囊，俺答分道入大同。大掠太原諸處。初，大同之變，諸叛卒多亡出塞。北走俺答，諸部。俺答擇其黠桀者，多與牛羊帳幕，令爲僧道、丐人，偵諸邊，或入京師。凡中國虛實，盡走告俺答。其有材智者，李天章、高懷智等，皆署爲長。至是，俺答率諸部入塞。大同鎮卒陰遣人與約，勿掠我人畜。我亦不闌汝。俺答諸部喜，與折箭而去。乃竟越大同，由井坪、朔州抵雁門，破靈武關，入崑崙、交城、汾州、文水、清源諸處，殺掠人畜萬計。遇大同卒，以所掠輜重遺之，求假道焉。巡撫大同史道，總兵王陞若不聞。宣府總兵白爵調赴應援，亦觀望不戰。巡撫山西都御史陳講告急，事下兵部。尚書張瓚曰：寇且退矣，何事？張皇。俺答、吉囊縱掠既飽，乃旋出塞。十二月，俺答、吉囊寇大同。

二十年九月，吉囊入大同塞。大掠太原等處。又越而南，殺掠人畜數萬。京師戒嚴。已而吉囊出關，未及塞。俺答復入，又越太原而南，至石州，殺掠甚衆。上命宣大總督樊繼祖發兵應援。繼祖竟不應援。俺答縱掠而去。

二十一年夏六月，俺答入大同。大掠太原而南。時吉囊掠忻代倡伎，縱淫樂不休，病髓竭死。諸子不相屬，分居套中。而俺答日強盛，有子曰黃台吉，臂偏短，善用兵，其衆畏之。用命過於父。俺答乃糾青台吉、呪刺

哈哈刺漢及叛人高懷智、李天章等，各擁衆數萬人，入大同塞。其精兵戴鐵浮圖，馬具鎧，刀矢鉅利。望之若冰雪，然不輕與我戰。卽餘騎足扼我矣。至是經朔州，破雁門關，掠太原而南。京師戒嚴。秋七月，廷議懸賞格，斬俺答頭與千金。官不次，其下偏裨三百金。官三級，無有應者。俺答乃擁衆越太原，列營汾水東西。掠潞安、平陽諸州縣。上命翟鵬提督宣、大、偏、保、山東、河南諸軍務。未至，諸軍連營不相統攝，皆觀望不戰。縱寇深入。俺答大衆駐平遙，介休間，散騎入山落中，殺掠人畜輜重，迤邐就大營。諸將竟無肯乘險邀擊者。已而俺答大得利，整衆且歸。副總兵張世忠自侯城村起營約誓諸將，蹣寇力戰。諸將皆閉營不救。俺答見世忠軍壯，戰又力，呼集精騎三千，蹙世忠圍之。世忠傷矢，裹創下馬步戰。俺答衆亦窘，會矢及火藥俱盡，俺答益衆蹙之。世忠憤呼曰：我軍被圍戰苦，諸將竟不相援。國憲天刑，甯汝道邪？復上馬督短兵接戰。自己至酉，兵死傷殆盡。諸軍卒無援者。世忠力竭，腦中二矢，墜馬死。部將張宣、張臣痛世忠死，亦力戰死之。俺答旣勝，復分掠定襄、五臺、孟縣。又自代州出繁峙、靈邱、廣昌，殺掠人畜十餘萬。乃從廣武出關，安行出大同左衛及陽和塞而去。俺答自六月丁酉入塞，至七月庚午始出。凡掠十衛三十八州縣，殺僇男女二十餘萬，牛馬羊豕二百萬。衣縷金錢稱是。焚公私廬舍八萬區，蹂田禾數十萬頃。詔贈世忠右都督，立祠祀之。

二十三年秋九月，俺答入大同塞。總督尙書翟鵬禦之。冬十月，俺答破宣府塞，入紫荆關。時以巡撫朱方請撤防秋兵太早，致俺答深入。翟鵬不能禦，俱逮繫下獄。鵬削籍，方杖死闕下。

二十四年，加總兵戚甯侯仇鸞太子太保，鸞甯夏人。祖鉞，以襲寘鐸功封伯。己平河北盜，進封侯。鸞粗悍。

敢大言。朝臣俱薦之。襲封守甯夏。先是吉囊寇甘肅。覽與總督侍郎張珩巡撫張錦禦卻之。遂上言督兵禦寇。追至朵蘭地。及之大戰。一日凡五捷。斬首百餘級。及斬吉囊子狼台吉。而竄其昆季。斷養卒姓名於籍中。稱有功。疏上。兵科劾覽奏捷辭多虛構。意涉誇張。往歲黑山墩之捷。謂臧吉囊子太不孩。竟成空言。今復以衣鎧鮮華。謂爲狼台吉。濫引勤王之語。妄覬封侯之勳。宜行勘覈。帝曰。勦獲旣多。厥功可嘉。其加鸞宮保。任一子所鎮撫。

二十六年夏四月。總督宣大侍郎翁萬達上言。俺答請求入貢。乞參酌其可否。巡按御史黃汝桂奏。北邊自火篩爲梗。貢禮寢廢。迄今四十餘年。自嘉靖辛丑。北邊諸部懷叵測之謀。石天爵倡入貢之請。去歲至今。又復踵行前詐。豈可輕信。墮其計中。蓋諸寇自庚子以來。連年蹂躪大同。深入潞澤。宣府抵紫荊。西掠延綏。東寇遼陽。塗炭我疆宇。殺掠我人民。凡我臣工。皆思翦此以雪憤。但時未可乘。勢當徐圖耳。故貢亦寇不貢亦寇者。外寇之故習也。貢亦備。不貢亦備者。邊臣之至計也。事機貴乎先圖。軍令重於申命。乞嚴勸總督鎮巡等官。加防禦。上曰。逆寇連歲爲患。詭言求貢。勿得聽從。其各嚴邊兵防禦。如有執異。處以極典。二十七年春正月。俺答入河套。三月。總督宣大翁萬達上言。俺答復投譯書求貢。帝命拒之。五月。俺答寇偏頭關。七月。寇大同。九月。俺答入宣府塞。寇居庸諸處。嚴嵩言於帝曰。俺答諸部以夏言。曾銑收河套。故報復至此。帝於是益怒。言不可解。銑與言先後皆棄市。詳議復河套

二十八年春二月。俺答大舉入寇。略大同。直抵懷來。指揮江瀚。董陽迎擊之。斬獲頗多。力竭無援。死之。總兵周尙文帥兵萬人。追至曹家莊。及俺答兵大戰。總督翁萬達親率銳卒繼之。俺答敗走。斬首五十五。獲

其器鎧無算。俺答兵傷痍甚衆。乃馳出塞。議者謂數十年間無此戰功。捷聞。諸臣陞賞有差。八月。俺答入宣府。大同塞。備禦官張景福百戶成策。李松力戰死之。

二十九年秋八月。俺答越宣府走薊州塞。入古北口。圍順義。長驅直入。戊寅。逼通州。大掠密雲。三河。昌平諸處。辛巳。進犯京師。壬午。俺答求入貢。命廷臣集議之。癸未。俺答犯諸陵。轉掠西山。良鄉。以西。遂東去。京師戒嚴。詳庚戌變

三十年春三月。與俺答通馬市。初。咸甯侯仇鸞倡大舉北伐之議。內實畏怯。乃密遣時義結俺答義子脫脫。使俺答以貢馬互市爲請。俺答利中國貨幣。投譯書宣大總督蘇佑求通市。佑以聞。帝命羣臣集議。羣力主之。羣臣弗敢異。上從之。乃以兵部侍郎史道往大同總理互市。兵部員外楊繼盛上疏力言不可。略曰。互市。市馬者。和親別名。俺答蹂躪我陵寢。虔劉我赤子。而先之曰和。忘天下之大讐。其不可一。北伐之詔下。天下曉然知聖意。日夜輸兵食以助京師。而忽更之曰和。失天下之大信。其不可二。以堂堂天朝。而下與邊臣互市。冠履倒置。損國家之重威。其不可三。天下豪傑。日夜磨礪其長技。以待試。而甘心於和款。謂國家厭兵。無所用之。隱豪傑效用之心。其不可四。庚戌之變。頗講兵事。無故言和。使邊鎮美衣。媮食而自肆。懈天下飭武之志。其不可五。往者邊臣私通外寇。吏猶得以法裁之。今導之使通。其不勾結而危社稷者幾希。開邊方交通之門。其不可六。伏羌之莽。在在有之。往者厭國威。不敢肆。今謂縣官懼而議和。啓內地不靖之漸。其不可七。俺答深入時。我雖不敢逆一矢。然彼知我有備也。備之已半歲。而互市終之。彼謂我尙有人乎。長俺答輕中國之心。其不可八。俺答狡詐。出沒叵測。我竭財力而罄之邊。彼負約不至。未



可知也。或因互市而伏兵。若吐蕃清水之盟。未可知也。或互市畢。卽入寇矣。而駕駛他部。未可知也。或以下馬索上價。或責我以他賞。或望我以苛禮。未可知也。墮俺答狡詐之謀。其不可九。大約歲帛數十萬。得馬數萬匹。十年之後。彼馬少而我帛亦不計。將何以善其後。不爲國家深長之策。其不可十。凡爲謬說者有五。不過曰吾外假馬市以羈縻之。而內寬吾以修武備。夫俺答至無厭也。至無恥也。吾安能一一而應之。是終兆釁也。且吾果欲修武備。而何所藉於羈縻。此一謬也。曰互市之馬。吾藉此以資吾軍。則又非也。旣和矣。無事戰矣。得馬將焉用之。且彼亦安肯捐其壯馬而予我。此二謬也。曰互市不已。彼且朝貢。夫至於朝貢。而中國之捐資以奉寇益大矣。此三謬也。曰彼旣利我。必不失信。又非也。夫中國之所開市者。能盡給其衆乎。不給。則不能無入掠。此四謬也。曰兵危道也。佳兵不祥。夫敵加於己。而應之。胡佳也。人身四肢皆癱疽。毒日內攻。而憚用藥石可乎。此五謬也。天此十不可五謬。匪唯公卿大臣知之。三尺童子皆知之。而敢有爲陛下主其事者。蓋其人內迫于國家之深恩。則圖倖目前之安。以見效。外懼俺答之重勢。則務中彼之欲。以求寬。然公卿大臣皆知。而莫爲一言止之者。止。則身任其責。而危。則人任其責。而安。陛下宜振獨斷。發明詔。悉按言開市者。選將練兵。聲罪致討。不出十年。臣請得爲陛下勒燕然之績。懸俺答之首於藁街。以示天下。後世疏奏。帝連閱。然之下。內閣及禮兵部會大臣集議。嚴嵩等唯唯莫敢以爲是。鸞憤然曰。豎子目不識兵。宜其易之。乃密疏搆之。而帝意遂中變。下錦衣獄。拷訊繼盛。持論不變。獄具。謫狄道典史。

夏四月。宣大馬市成。史道主市事。每一馬償幣若干。俺答驅馬至城下。計直取償。事竣。俺答貢良馬九。乞

再爲市。仇鸞請敕厚賚之。賜衣幣甚渥。遣官宣諭朝廷恩威。仍敕嚴飭部落。勿得生事開邊釁。秋七月。俺答獻叛人蕭芹等。初。華人蕭芹、張扳隆、王得道、喬源、邱富等六十餘人潛出塞降俺答。俺答任用之。邱富每教以火食屋居。俺答竟不敢屋居也。爲築板升處之。至是馬市通。俺答頗利之。芹等弗肯。請仍謀入塞剽掠。俺答不悅。仇鸞遣時義昭俺答以利。諷令縛獻芹等。俺答以爲然。遂擒芹及扳隆、得道等三十餘人。械至大同塞下。納譯書於總督史道。史道以聞。其邱富、喬源等三十五人俱走免。芹等伏誅。詔進仇鸞、史道官爵。餘各陞賞有差。十二月。俺答寇大同。初。史道主宣大市事。俺答以贏馬多索價。直弗予。輒大譁入大同市。寇宣府。宣府市寇大同。甚者朝市暮寇。幣未出境。而警報隨至。併所得贏馬掠之去。俺答衆日往來大同城外。訊之。輒以貢市爲言。將士不敢拒。各邊垣及諸營堡俱壞。戍卒盡撤。俺答遊騎可長驅至城下矣。史道上言。俺答無馬者。許以牛羊入市。酬粟豆。科道交章阻之。俺答又請開市於遼東。巡撫遼東許宗魯移書兵部。反覆陳不可狀。事得寢。俺答知市利不博。是月。三寇大同。巡按御史李逢時上言。數日之內。俺答三入寇。似與通市情實相左。乞敕邊臣多方備禦。仍遣使俺答宣示恩威。令其約束部落。勿啓邊釁。每歲六九月通市外。不許頻復求請。倘若服從。與通市如故。若面從心違。據實奏報。一意戰守可也。兵部尚書趙錦言。自古禦寇之道。戰守爲上。羈縻終非長策。乃開市甫畢。而旋三入寇。防微杜漸。誠宜審處。上命督臣偵探備禦。并嚴私通之禁。

三十一年春正月。俺答寇大同。巡按御史李逢時上言。俺答敢於歲初擁衆入犯。可見馬市之羈縻難恃。今日之計。惟大集兵馬。一意討伐。宜行各邊臣合兵征勦。仍敕京營大將仇鸞訓練甲兵。專事征進。勿得

隱忍顧忌。釀成大患。帝曰。俺答非時擾攘。邊兵不能防禦。皆因平日專恃馬市。全不設備。故爾。今後一意戰守。如仍前觀望。重懲不貸。二月。俺答復入大同塞。時仇鸞佩大將軍印。偃蹇畏懦。不敢發兵征進。又恃通市。亦不嚴飭邊將防禦。而大同總兵徐仁復驕縱。聲言馬市既通。無庸戍守。恣意陵克。巡撫都御史何思亦以通市故。卽有警。輒匿不以聞。有拒殺零騎者。抵死。以故俺答衆出入關隘。無復顧忌。動以貢市爲名。往來官寺。有司虞餽惟謹。稍拂意。輒大鬪。甚至直入堡城。姦辱婦女。莫敢誰何。至是。俺答衆萬餘入塞。直抵懷仁大掠。徐仁等各擁兵觀望不擊。游擊劉潭陰遣人結俺答鬻路。獨中軍指揮王恭率所部禦之。戰於管家堡。力屈死之。俺答得利遁去。代府饒陽王上言其事。上命逮徐仁。劉潭等詣京。卽訊議處。何思削籍。王恭贈都督僉事。任一子祠祀。三月。罷馬市。時邊防久廢。言官屢以爲言。仇鸞亦慮禍及。密疏請止。乃罷市。召史道遠。帝命復言開馬市者論死。著爲令。於是兵部上言。往歲宣大戍卒自足。戰守自簡。銳卒入衛京師。衆分勢散。致調各鎮兵赴援。奔命疲勞。餽餽繁費。數年以來。費百餘萬。後將何繼。不若以本鎮士著壯夫補足原額。庶供億可省。而戰守足恃。從之。初。總督翁萬達修築宣大邊垣千餘里。烽墩三百六十三所。頗完固。後以通市故。大半爲俺答衆所毀。兵部請敕邊臣修補。給事中李幼滋上言。敵壘卑小。宜於垣上增築高臺。營建房廡。以棲火器。俱從之。夏四月。大將軍仇鸞帥師出塞。襲俺答於威甯海。敗績而還。朵顏三衛導俺答衆數萬。由遼東前屯衛撤去。邊垣七十餘里。掠至甯遠。備禦官王相力戰死之。詔贈相都督同知。時俺答數寇遼薊。皆朵顏導之。爲患益劇。秋七月。俺答寇薊州塞。先是。遼東報至。仇鸞請行邊。已而中止。至是。薊州報急。鸞當出禦。適疽發背。不能出師。然顧戀大將軍印。不肯辭。又

無有敢言易將者。兵部尚書趙錦曰：事迫矣。乃上言大將軍病不能禦敵，而印在大將軍所，諸偏裨不行，請暫假大將軍印，自將兵禦之。帝謂本兵不可出師，令收大將軍印綬上之。別遣將將兵，錦乃夜馳至。鸞第收鸞印綬，以總兵陳時代鸞佩大將軍印。鸞聞大恚，疾益劇，遂死。時上已心知鸞奸逆，未發。命都督陸炳密訪之。炳素惡鸞，常伺察其動靜，得其諸奸事，欲即發，尚恐無案驗。會時義侯榮姚江皆冒功授錦衣衛指揮等官，知鸞死，事必敗，遂以八月十一日出奔居庸關，鞏華城諸處欲叛出塞。炳知之，使關吏及邏者執之以聞，詔下獄。炳乃益發其前後交通納賄諸亂政狀，帝大怒，令諸司會鞫之。下制暴鸞罪惡，剖棺戮其屍。父母妻子及時義侯榮等皆斬，籍其家。下詔布告天下。俺答聞之，引去。趙錦亦以初附鸞，譴戍。於是帝諭更戎政，悉改鸞措置約束。冬十月，宣大總督蘇祐與巡撫侯鉞、總兵吳瑛奉詔出師北伐。鉞率數萬人出塞，襲擊俺答幕。俺答知之，會兵逆擊，殺把總劉欽等七人。士卒死者無算。瑛等急斂衆歸塞內。巡按御史蔡朴上言其狀，因劾祐。鉞詔不問，仍命卹劉欽等。

三十二年閏三月，俺答寇大同，副總兵郭都出戰死之。詔逮巡撫侯鉞爲民。予都卹典。夏四月，巡撫宣府都御史劉鵬上言修築邊垣，須用甄灰，以圖永久。山西一鎮，須用六十餘萬，請給發。御史秦朴亦言土沙易圮，費當不資，俱下兵部議。尚書聶豹言奏乞之數六十餘萬，則經營必須十年，財力既不辦。况曠日持久，無救目前。可姑爲旦夕防禦之計。日後別圖永世之利從之。冬十月，朵顏糾俺答率衆二十萬薄古北口，烽火達京師。帝懲庚戌事，憂日旰忘食，遣使偵諸軍戰守狀。總督薊遼侍郎楊博躬擐甲乘城督將士防禦甚力。俺答百道攻塞垣，博隨方拒擊，終不能入。使者以狀聞，帝大悅，卽軍中賜博衣一襲，發帑

金萬兩犒將士。博承命宣朝廷威德。諸將士人人喜。勇氣益倍。與俺答守八日。俺答不得利。乃引退。猶徘徊數舍外。不即去。博募敢死士持火械。夜數入其營擾之。寇衆倉皇宵遁去。

三十三年秋七月。俺答衆數萬入大同塞。官軍敗績。逮總督尙書蘇祐。巡撫齊宗道於獄。十二月。俺答寇大同。總督侍郎許論。巡撫都御史王忬徵兵擊走之。

三十六年秋八月。俺答衆二十萬入雁門塞。破應州四十餘堡。總督楊順縱兵殺避難兵民。上首功以自解。已而辛愛妾桃松寨私部目懼誅來降。順上其狀以爲功。辛愛俺答子。士馬雄諸部。且入寇。順懼。上言俺答叵測。欲脅朝廷歸之。敵故薄順等無能。且黠甚。詐言以叛人邱富來易。順信其言。予之。辛愛戮桃松寨。邱富竟不可得。順懼罪。賂巡按御史路楷隱其事。給事中吳時來聞之。上言桃松寨來降。不過寇中一亡婦耳。苟明於啓覆之媒。拒之勿納可也。始則張皇己功。既而輕墮敵計。乃行賂按臣。相爲欺蔽。然則朝廷邊餉之用。祇借順等潤家之資耳。疏入。上怒。逮順。楷下獄削籍。以兵部尙書許論比順。楷亦罷之。

三十七年春正月。俺答圍大同右衛。不克。四月。命兵部尙書楊博出督宣大軍務。時右衛圍久不解。議者以爲非博往不可。遂有是命。仍虛部中位以待之。博乃徵諸鎮兵。聲言出塞北伐。勿檄日數十下。俺答聞博至。乃引去。守將尙表拒守四閱月。誓志勵衆。死守不屈。博上其功。優敘之。王德戰死。奏立祠加卹。參將周現潛通俺答。奏褫之。自是邊人俱砥礪思自奮。博因陳善後二十餘事。築牛心諸堡。爲烽墩二千八百餘所。濬濠千餘里。五旬訖功。帝大悅。博太子太保。

四十五年春正月。俺答寇宣府塞西陽河。先是。朵顏革蘭台影克每歲引小王子諸部寇蘄遼。四十二年。

由牆子嶺直犯通州。京師震動。而宣大諸邊頗安靖。至是復入寇宣府。旋引去。

穆宗隆慶元年夏五月。俺答犯大同。參將劉國引兵禦卻之。九月。俺答子黃台吉擁衆窺伺陵後南山。上命總督劉壽率兵防護。俺答寇山西石州。陷之。殺知州王亮。留壁石州。剽掠交、汾等處。山西騷動。會有薊鎮之警。京師戒嚴。上命羣臣議防禦策。大學士徐階條十三事。時俺答入邊已二十餘日。勢甚橫。已。雨潦連旬。馬多死。皆杖馬箠徒步還。所剽獲不能盡載。往往遺於道甚衆。十餘日始盡出邊。而官軍無一人邀擊者。大同總兵申維岳、孫吳等覘俺答既去。汾石始約兵進戰。及俺答出。崑崙東北。孫吳以非己信地。引還大同。維岳等終不敢戰而還。十四日。俺答始悉去。諸將乃稍稍出。獲奸細明海等。及他老幼疲弱。掩襲得之。以爲功。諸將獨方振一與俺答遇。九月。逐俺答於嵐縣。稍稱敢戰而已。事聞。詔奪督撫鎮諸臣官聽勘。而逮諸將至京。鞠之。議功罪。賞罰有差。時邊臣異懷。怠玩。掩罪冒功。積弊已久。故恣寇出入。動得利去。至是議罰將士。始知畏法焉。

二年夏五月。兵部言山西一鎮。舊以大同爲藩籬。警備差少。自嘉靖壬寅失事之後。大同棄牆不守。遂與俺答爲鄰。三關邊隘皆俺答必犯之地矣。然鎮臣尚在內地。俺答必糾合諸部。乃敢深入。故在關內。則憂大舉。傍老一帶逼近寇巢。居常則有遊騎出入之苦。遇冬則有套騎履冰之備。故在關外。則慮零寇。今甯武在忻代偏崑之中。旣以總兵駐師。便於東西策應。而關外一帶宜增設防禦。請發太僕金。益募軍買馬以備之。上令施行。

四年冬十月癸卯。俺答孫把漢那吉率其屬阿力哥等十人來降。把漢那吉者。俺答第三子。鐵皆台吉之

子也。幼孤。育於俺答妻。一刻哈屯所。命僕阿力哥之妻乳焉。及長。那吉多智。有口辯。俺答娶塔比吉女爲之婦。不相能。復聘兔捨金的之女。適俺答長女。噎不害有所生三娘子者。貌甚艷麗。已受襖兒都司聘。俺答奪取之。襖兒悲甚。將攻俺答。俺答無以解。即以那吉所聘兔捨金的女償之。那吉怒。謂阿力哥曰。我祖妻外孫。又奪孫婦與人。吾不能爲若孫。吾行矣。遂與阿力哥同妻比吉女等十人南走。叩關請降。總督王崇古留之。邊吏譁曰。此孤豎無足重輕。宜勿留。崇古曰。此奇貨可居。俺答急。卽因而爲市。諭以執送叛人趙全等還我。乃優遣以慰其砥牘之愛。而制其命。若其弗急。則我因而撫納。如漢質子法。使招其故部居近塞。俺答老且死。其子黃台吉勢不能盡有其衆。然後以居蒼谷。蠡秩置塞外。其與黃台吉構。則兩利而俱存之。弗構。則以師助之。外以博興滅扶危之名。而實收其力。廷臣譁然以爲不可。御史葉夢熊爭尤力。上曰。寇慕義來降。宜加優撫。其以把漢那吉爲指揮使。阿力哥爲正千戶。各賞大紅紵絲衣一襲。俺答婦恐中國戕其孫。日夜尤俺答。俺答尋亦悔。遂擁十萬衆壓境。崇古命百戶鮑崇德諭以存卹恩。而要其縛叛示信。俺答頗銜之。乃留崇德。隨遣騎覘之。則那吉方蟒衣貂帽。馳馬從容。歸報。俺答與婦感且愧。曰。漢乃首全吾孫。吾且嚙臂盟。世服屬無貳。奚有於叛人。遂定盟通貢市馬。而諸部亦貪中國財物。咸從與無間言。十二月。俺答執叛人趙全等九人來獻。索那吉許之。先是山西妖人呂明鎮以白蓮妖術謀不軌。全與邱富等從之。事覺。明鎮伏誅。富與全率黨李自馨、劉四、趙龍、呂老十、猛谷王之屬叛歸俺答。駐邊外古豐州地名曰板升。已而我百戶張彥文游擊家丁劉天祺邊民馬西川等二十八人悉往從之。衆至數萬。因尊俺答爲帝。富犯邊死。全等治第如王者。署其門曰開化府。至是誘執之。至雲石堡待命。總督王崇

古受其獻。悉送闕下。誅之。遣使送歸那吉。那吉猶戀戀不欲行。崇古諭以朝廷恩意。許奉表通貢不絕。那吉感泣。誓不敢貳中國。攜其妻以歸。崇古以款俺答功。加少保。尙書。巡撫方逢年。兵部尙書郭乾。侍郎谷中虛。王遴各陞賞有差。又加恩輔臣李春芳。高拱。張居正。殷士儻及原任大學士趙貞吉等五人。五年三月己丑。封俺答爲順義王。及其子弟部落爲都督等官。俺答得孫後。遣使來謝。且乞表式。請封王。崇古疑吉囊大把都未與盟。恐有詐。未許。蓋吉囊者。俺答兄。老把都兒。昆都力哈。俺答親弟也。吉囊死。子四。長曰吉能。皆爲俺答姪。而兀慎擺腰。永仰卜。哆囉土蠻等部又多其支屬。俺答於諸部爲尊行。力能合之。必同心內附。始可假以王封。得比三衛例。崇古以此脅俺答。俺答以土蠻故。主力不能致爲辭。而崇古獨自計。老把都與土蠻善。且內親黃台吉。會黃台吉使來。乃令其約老把都以招土蠻。與俺答會同請封。因可以破三衛交構之私。至是。俺答始與老把都吉能。永部下諸部各遣使十八人請通貢開市。以息邊氓。詔下羣臣廷議。定國公文壁。吏部侍郎張羅等二十二人爲可。英國公裕。戶部尙書張守直等十七人爲不可。工部尙書朱衡等五人以爲封貢便。互市不便。獨都御史李崇極言宜許。狀上。卒如崇古議。封俺答王號。貢期聽於三四月後一行。互市之數。先定馬數。其貢使不得至京。鐵鍋諸物不得闌出。賞大紅五綵紵絲蟒衣一襲。綵緞八表裏。五月。總督王崇古爲俺答陳乞四事。一請給王印。如先朝忠順王例。二請許貢入京。比於三衛。各貢使貢馬三十四。三請給鐵鍋議廣鍋十觔。煉鐵五觔。尙未可爲兵器。洛鍋生粗。每十觔煉鐵三觔。宜可給與。以敵易新。四請撫賞部中親屬布段米豆。散所部窮丁塞上。仍許不時小市。六月。順義王俺答使恰台吉。打兒漢報趙全餘黨趙崇山。穆教清。張永保。孫大臣。及妖人李夢陽等。



來獻。上嘉其誠順。賞白金三十兩。彩幣四表裏。恰台吉等各十兩。一表裏。御史劉良弼以封貢事畢。上疏陳六漸。一曰封疆弛守之漸。二曰屬部疑叛之漸。三曰將領推諉之漸。四曰塞下虛耗之漸。五曰勇士散逸之漸。六曰市地增加之漸。又言黃台吉嚮化不醇。他日必爲邊患。大學士高拱言嘉靖十九年北寇求貢。當事憚於主計。斬使絕之。三十餘年。邊民肝腦塗地。此往歲之明失。今其感恩慕義。直受而封錫。猶非要領之圖。本意之所在也。及此閒暇。積我金。修我險。練我士。整我械。開我屯田。理我鹽法。皆得次第行之。彼若背約。遂興問罪之師。進退各有餘地。苟見一時。遂爾偷怠。良時不再得。邊備寢弛。難振矣。上嘉納施行。

六年九月。俺答貢馬二百五十四。時穆宗已崩。神宗卽位。十月。授俺答兄子永邵卜大成都督同知。十二月。遣俺答舊使火力赤。奴謀赤北還。嘉靖間。奉使六人。以俺答內犯下獄。二十年餘。俱物故。至是釋之。

神宗萬曆元年三月。頒順義王俺答番經。并給鍍金銀印。

二年十二月。順義王俺答子賓免求河西互市。邀索刀仗。朝議絕之。兵部言以一部啓各鎮拒絕之心。非計也。宜諭俺答令其子改圖。遂令督撫臣諭之。

三年夏四月。賓免駐牧西海。役屬兒革白利等番屢擾邊境。詔陝西總督諭俺答嚴戢賓免。俺答言賓免因甘肅不許開市。苦甯遠途遠。巡撫甘肅都御史侯東萊上言。賓免屢侵諸番。以報其掠馬。因圖請市。河西彫敝。開市爲難。苟可安邊。何惜甘肅一垣而不以糜之也。上從之。遂立大市於甘州。小市於莊浪。十

月。俺答乞佛像蟒段。且城市成。求賜名。賜城名福化。量給其請。是年。黃台吉改貢市於新平堡。四年十二月。銀定台吉所屬營邊。絕其貢。俺答聞之。從彼法罰羊千馬二百。駝二。詔宥之。已服罪。馬駝等不必進。

五年二月。順義王俺答執叛盟獻鶴等四人上。賜俺答幣。諭叛者如法。三月。俺答請開市茶馬。又求都督金印。朝議以請屬部並無金印。宜諭遣上從之。九月。俺答上書甘肅巡撫。復求茶市。初。西番羶藏請納馬保塞。廷議勿受。巡茶御史李時成上言。羶藏生西番中。俗極遠。未嘗通貢市。一朝率衆來降。彼實畏我威靈。第以洮西極邊地。更得此族。不益厚固藩籬耶。矧今急須馬。何爲拒之。上從之。俺答以番人入漢久。且慢我。遣大都巴石虎啓幕府。請得比番開茶市。廷議且許之。李時成復奏言。俺答今求茶市。意不在茶。在得番人耳。夫洮西一帶。抵嘉峪金城。綿互數千里。番族星羅。西寇之不敢長驅而南。以番爲之蔽也。顧番人須茶最急。一日無茶。則病且死。是番人之命懸於中國。俾世受約束。藩我西土。脫以茶市假之。俺答逐利而專意於番。番求生而制命於俺答。彼此合一。其遺患可勝道哉。上是之。兵部謂茶市不可許。但俺答稱迎佛僧寺。必須用茶。量給數十笕。示恩報可。俺答復求開洮州茶市。進馬五百匹。諭止之。

七年秋。俺答請寺額。詔名其寺曰宏慈。

八年秋八月。加順義王俺答次子不他失驃騎將軍。常漢我不良台吉等百戶。

九年秋八月。順義王俺答上表貢馬。十二月。順義王俺答死。賜祭七壇。采幣十二雙。布百疋。其妻三娘子率其子黃台吉上謝表。貢馬。黃台吉者。俺答長子也。嘉靖時。有精騎萬餘。庶弟曰青台吉。精騎半之。俺

答老矣。娶二妻。棄其妻。黃台吉怨之。妻各子一人。俺答子萬騎自備。以故中自疑。不敢深入。黃台吉日夜  
扼腕曰。老婢子有此兵而老死沙漠。可笑也。及俺答歸款。益老而厭兵。且佞佛。聽番僧言。戒殺掠。朝朝廷  
威信亦足以服之。以故十餘年終保塞不敢南犯。先是。王崇古入爲大司馬。繼崇古者方逢時。吳兌代爲  
總督。各部俱貢市無失期。而三娘子切切慕華。不時款塞。常詣兌。兌兒女畜之情甚暱。或三娘子致手書  
索金珠翠鈿。兌隨市給與。以敦和好。部落中間有梗化者。三娘子時時報聞。督府得預爲備。  
十年。總督鄭洛遣通事馬應時伴爲趣貢事。陰以詞之。三娘子遣十骨赤請寬假辭以無嗣。王表文空其  
印。

十一年閏二月。黃台吉襲封順義王。更名乞慶哈。黃台吉先配五蘭比妓。後受西僧給。納婦一百八人以  
象數珠。俺答死。黃台吉將收三娘子。三娘子嫌其老病。將別屬。督臣鄭洛計曰。若三娘子別屬。我封此黃  
台吉何用。乃命人說三娘子曰。汝歸王。天朝以夫人封汝。不歸一婦耳。於是三娘子逼於利害。乃歸之。黃  
台吉襲封僅四年。三娘子佐之。貢市惟謹。

十四年二月。順義王黃台吉死。子擗力克襲位。初。把漢那吉歸。俺答命主板升。號曰大成台吉。妻曰大成  
比妓。兵馬雄諸部。癸未年死。三娘子欲令己子不他。失禮妻比妓。而俺答用事臣恰台吉勿從。陰主擗力  
克以兵收比妓爲妻。三娘子名哈屯別築城居。朝廷賜名歸化。至是。黃台吉死。擗力克當嗣。督臣鄭洛復  
諭擗力克曰。娘子三世歸順。汝能與娘子聚。則封不亟聚。封別有屬也。擗力克盡逐諸妾。乃以十月入三  
娘子帳中合婚。其部落牙答漢盜我助馬堡。洪寶盜我偏頭關。三娘子俱罰治如法。

十五年秋七月。封捨力克爲順義王。三娘子爲忠順夫人。

十八年。大學士王錫爵上言。古謀國之臣。無事則深憂。有事則不懼。自封款十九年。順義王捨力克以助。火落赤故罷市。賞兩年未與。忠順夫人三娘子捕叛人。史二致塞上。請復市賞。詔復。二年以三娘子兒不他失禮爲都督。史二卽捨力克兄安兔壻也。仍寬假其罪。分列於龍門滴水崖。史二亦款服。二十年來。吏恬卒玩。一旦封豕生心。舉朝惶怖。止辦嗷嗷。追尤首事。此一反也。武官嚮下求安。專藉款關之利。文吏隙中觀鬪。爭談出塞之功。此二反也。諸邊以彼此支吾爲熟套。以日月玩愒爲良謀。一遇緩急。重難之事。則隔垣內外。便分爾我。逃責於己。而嫁禍於人。此三反也。臣謬爲三反之論。而約以經營鎮定之一言。蓋欲少省議論。使當事可以措手。暫寬文法。使文武貴於同心。詔可。

四十一年春二月。捨力克旣歿。卜失兔以長孫嗣封。而素囊阻之。越冬講乃成。於是總督涂宗濬以爵禮請。詔卜失兔襲封順義王。把漢比妓封忠義夫人。西僧哀乞蓋授都綱。遣官贖封。敕至邊。各散去不受。御史李若星疏論。卜失兔抗旨。回巢踰年。告款塞上。乃始受封。其部落多散失。遂不競。

### 卷六十一

#### 江陵柄政

世宗嘉靖四十三年秋七月。以諭德張居正充裕王講官。

穆宗隆慶元年二月。加恩侍從潘邸諸臣。以禮部右侍郎張居正爲吏部左侍郎。兼東閣大學士。直內閣。

四月進禮部尚書武英殿大學士。

二年春正月進大學士張居正少保。八月居正上疏陳大本急務六事。一曰省議論。凡事不貴無用之虛詞。務求躬行之實效。欲爲一事。須審之於初。及計慮已審。卽斷而行之。如唐憲宗之討淮蔡。雖百方沮之。而不爲搖。欲用一人。須慎之於始。既得其人。則信而任之。如魏文侯之用樂羊。雖謗書盈篋。然終不爲之動。一曰振紀綱。近年以來。綱紀不肅。猥以模稜兩可。謂之調停。以委曲遷就。謂之善處。伏望刑賞予奪。一歸公道。而不曲徇乎私情。政教號令。一斷宸衷。而勿紛更於浮議。一曰重詔令。近日以來。朝廷詔旨。多格廢不行。至十餘年未竟者。文卷委積。多致沈埋。年月既遠。事多失真。遂使漏網終逃。國有不申之法。覆盆自苦。人懷不白之冤。是非何由而明。賞罰何由而當。伏乞敕下各司。嚴立限期。責令奏報。違者查參。一曰覈名實。器必試而後知其利鈍。馬必駕而後知其駑良。今用人則不然。官不久任。事不責成。更調太繁。遷轉太驟。資格太拘。毀譽失實。臣願皇上慎重名器。愛惜爵賞。用人必考其終。授人必求其當。仍敕吏部嚴考課之法。審名實之歸。一曰固邦本。今風俗侈靡。官民服舍。俱無定制。外之豪強兼併。賦役不均。花分詭寄。偏累小民。乞敕內外諸司。悉心清理。一曰飭武備。今議者皆曰兵不多。食不足。將帥不得其人。臣以爲此三者皆不足患也。夫兵不患少而患弱。今軍位雖缺。而糧具存。若能按籍徵求。清查冒占。隨宜募補。從實訓練。何患無兵。捐無用不急之費。以撫養戰鬪之士。何患無財。懸重賞以勸有功。寬文法以伸將權。則忠勇之夫。孰不思鬪。又何患於無將。至於目前自守之策。莫要於選擇邊吏。團練鄉兵。併守墩堡。臣考前代及吾祖宗。俱有大閱之禮。以習武事。而戒不虞。今京師內外。守備單弱。伏乞敕戎政大臣。申嚴軍政。

設法訓練。每歲農隙之時。恭請大閱。以試將帥之能否。軍士之勇怯。注意武備。整飭戎事。亦足以伐外寇之謀。銷未萌之患。疏入。上曰。覽卿奏。皆深切時務。具見謀國忠悃。所司詳議以聞。於是都御史王廷等覆振紀綱。重詔令二事。析爲八則。疏上。上允行之。兵部覆飭武備事宜一議。兵一議。將一議。團練鄉兵一議。守城堡一議。整飭京營。又奏大閱之禮。宣宗。英宗嘗行之。恭請親臨較閱。如閣臣所奏。上曰。大閱既有祖宗成憲。允宜修舉。其先期整飭。俟明年八月舉行。餘悉如議。戶部議固邦本。言財用之當經理者。有十宜。嚴法整飭。上一允行之。十二月。廢遼王。大學士張居正。故隸遼王尺籍。至憲嬾頗驕。多所凌轢。居正銜之。而又羨其府第壯麗。會告王謀反。刑部訊治。侍郎洪朝選案驗無謀反狀。僅坐以淫酗。憲嬾錮高牆。廢其府。居正攘以爲第。後復恚朝選不附反律。謀殺朝選。

三年九月。上大閱於京營教場。敕諭戎政官及諸吏卒。先是。給事中駱問禮言。大閱非今時所急。不必仰煩聖駕。居正力持其說。上遂行之。

四年十二月。大學士張居正。秩滿。兼太子太傅。吏部尚書。進少傅。兼建極殿大學士。

六年春正月。進大學士張居正少師。五月上不豫。已酉。大漸。召閣臣高拱。張居正。高儀。至乾清宮受顧命。上倚坐御榻。皇后及皇貴妃咸侍。東宮立於左。上困甚。太監馮保宣顧命曰。朕嗣統方六年。今疾甚。殆不起。有負先帝付託。東宮幼沖。以屬卿等。宜協輔。遵守祖制。則社稷功也。拱等泣拜而出。翼日上崩。六月甲子。皇太子即位。年始十歲。時太監馮保。方居中用事。矯傳大行遺詔云。閣臣與司禮監同受顧命。廷臣聞之俱駭。一日。內使傳旨至閣。拱曰。旨出何人。上沖年。皆若曹所爲。吾且逐若曹矣。內臣還報。保失色。

謀逐拱。拱與居正俱負氣不相下。居正乃結保自固。時臺諫交劾保。必欲斥之。而高拱自以與居正及高儀同與。憑几每慷慨收宮府權。曰老臣謬膺託孤。不敢不竭股肱。凡內降命敕。府部章奏。自合公聽並觀。有傳奉中旨。所司按法覆奏。白老臣折衷之。以復百官總已之義。拱內慮馮保專恣。與居正儀謀去之。居正陰洩之。保乃與保謀去拱。六月既望。庚午昧爽。拱在直。居正引疾召諸大臣於會極門。促居正至。拱以爲且逐保也。保傳皇后。皇貴妃。皇帝旨曰。告爾內閣。五府。六部諸臣。大行皇帝賓天先一日。召內閣三臣。御榻前。同我母子三人。親受遺囑。曰。東宮年少。賴爾輔導。大學士拱攬權擅政。奪威福自專。通不許皇帝主管。我母子日夕驚懼。便令回籍閒住。不許停留。爾等大臣受國厚恩。如何阿附權臣。蔑視幼主。自今宜洗滌忠報。有陷往轍典刑處之。拱即日出朝門。得一牛車。立而附載。緹騎兵番跟踰追逐。喪厥資斧。大臣去國。以爲異聞。拱去。居正爲乞馳驛。乃傳歸。而高儀未幾亦卒。以病死。居正裒然首輔矣。辛酉。上御平臺。召張居正慰勞之。曰。皇考屢稱先生忠臣。居正頓首泣謝。曰。今國家要務。惟在遵守舊制。不必紛更。至於講學親賢愛民節用。又君道所先。乞聖明留意。上曰。善。隨賜酒饌銀幣。居正既柄政。慨然以天下爲己任。中外想望丰采。一意尊主權。課吏實。嘗言高皇帝得聖之威者也。世宗能識其意。是以高臥深宮之中。朝委裘而不亂。今上世宗孫也。柰何不法祖。具詔草請於上。召羣臣廷飭之。百寮惕然。八月。張居正請開經筵。復請更定常朝日期。御門聽政。俱從之。上遂御文華殿日講。以爲常。十一月。太監崔敏請買金珠寶石。居正上言。前六月間。奉命停止。今忽有此舉。是前詔不信也。乞暫停之。以甦民力。因封還敏疏。遂報罷。十二月。張居正進帝鑑圖說。上見捧冊進。喜動顏色。遽起立。命左右展冊。居正從旁指陳大義。上

應如響。因卽宣付史館。賜居正銀幣一日。上御文華殿講畢。覽至漢文帝勞軍細柳事。居正因言。皇上當留意武備。祖宗以武功定天下。承平日久。武備日弛。不可不及蚤講求也。上稱善。甲戌。張居正奏請明年正月上旬卽御殿日講。但先帝喪未期。勿設宴。并免元夕燈火。上曰。已蚤停止。每侍聖母膳。甚簡素。或逢節日。具果宴。不設樂。居正稱善。尋諭光祿卿免節閒供應七百餘金。戊寅。張居正上言。制敕宜尙簡嚴。近來過爲誇侈。臣諛其君。猶謂之佞。况以上諛下乎。乞戒代言諸臣。復古從實。毋壞制體。從之。神宗萬曆元年春正月辛卯。命成國公朱希忠。大學士張居正。知經筵事。上甚敬禮居正。每日御經筵。居正以詩書入。在文華殿後。張小幄道膝密語。一日。居正在直廬感病。上御煖閣親調椒湯賜之。盛暑御講。上就居正立處。令內使搖扇。隆冬進講。以毡片鋪地。庚子。蚤朝。上出乾清宮。見一無鬚男子。僞作宦者狀。袖有佩刀。趨走惶遽。左右執之。馮保立鞫之曰。南兵王大臣。奚自。曰。自總兵戚繼光來。保使密報居正。而居正令附保耳曰。戚公方握南北軍禁。無妄指。可借以除高氏。保故甘心陳內監洪。已逮洪錮禁獄。令大臣供之矣。先是。大臣爲戚帥三屯營。南兵不遂。流落都下。爲人巧捷便佞。一中貴。曠之。至是。令稱拱使。改籍武進縣。卽令廁卒辛儒衣大臣蟒袴。予二劍。劍首飾貓精異寶。送繫廠中。入以聞。請究主使人。居正亦上疏如保意。上卽付保鞫。保令辛儒屏語。大臣曰。第言高相君怨望。使汝來刺。願先首免罪。卽官汝錦衣。賞千金。不然。重拷掠死矣。因使儒畀大臣金。美飲食之。儒日與大臣狎款。卽令誣拱家人爲同謀。獄具。保飛發五校械拱僕。而居正前疏傳中外。口語籍籍。謂且逮拱。居正乃密謀於吏部尚書楊博。博曰。迫之。恐起大獄。仰上神聖英銳。持公平察。高公雖粗暴。天日在上。安得有此。居正面赤不懌。曾大理少卿李幼



孜者。居正鄉人。亦與疾告居正曰。公柰何爲此。惡名污青史矣。居正強應曰。吾爲此事。憂不如死。何謂我爲。居正禁科道官不得有言。而御史鍾繼英。疏不敢明言。暗指之。居正怒。擬旨詰問。左都御史葛守禮語楊博。過張公必諍之。博曰。向已告矣。守禮曰。輿屬公。謂公能不殺人媚人耳。大獄將起。公柰何以已。告爲解。卽共過居正。居正曰。東廠獄具矣。同謀人至。卽疏處之耳。守禮曰。守禮敢附亂臣黨耶。顧以百口保高公。居正默不應。博曰。願相公持公議。扶元氣。廠中甯有良心。倘株連者衆。事更有不可知者。居正堅不承。博與守禮因歷數先朝政府同心輔政。及貴澤分宜。華亭新鄭。遞相傾軋。相名坐損。可爲殷鑒。居正憤曰。二公意我甘心高公邪。奮入內。取廠中揭帖投博曰。是何與我。揭帖有居正竄改四字。曰。歷歷有據。而居正忘之。守禮識居正手笑。而納諸袖。居正覺曰。彼法理不諳。我爲易數字耳。守禮曰。機密重情。卽上聞。先政府耶。吾兩人非謂相公甘心高公。以回天非相公不能。居正揖謝曰。苟可效。敢不任。第何以善。後博曰。相公患不任耳。任則何難。善後須得一有力世家與國休戚者。乃可委治。居正悟。始言上前度處之上。卽命馮保與左都御史葛守禮。都督朱希孝會審。而希孝懼。與其兄成國公希忠相對泣曰。誰畫此策也。以覆吾宗。急詣居正。請命。居正曰。第見冢宰大中丞。希孝泣謁博。博曰。欲借公全朝廷宰相體耳。何忍以身家陷公。顧亦何難。公第使善詞校尉入獄。訊刀劍口語所從來。雜高家僕稠衆中。令別識。且問見高公何所。今在何地。立辨矣。希孝如博言。使善詞校尉密詢大臣。何自來。則來自保所。語盡出保口。校尉卽告大臣。人宮謀逆者。法族。柰何甘此。若吐實。或免罪。大臣茫然哭曰。始給我主使者罪大辟。自首無恙。官且賞。豈知當實言。適高家僕逮至。希孝雜諸校中。令揚色。大臣不辨也。及會審。風霾大晦。尋雨雹不止。

東廠理刑白一清者。謂保初問官二千戶曰：天意若此，可不畏乎？高相國顧命大臣，本無影響，強我誣之。我輩皆有身家，異日甯免誅僇耶？皆曰：馮公已爲具詞，固有陰持之者。柰何？一清曰：東廠機密重情，安得送閣改乎？頃之，天稍明，出大臣會問。故事，先雜治。大臣呼曰：故許我富貴，何雜治也？馮保卽問曰：誰主使者？大臣瞋目仰面曰：爾使我，乃問也。保氣奪，強再問。爾言高相國何也？曰：汝教我，我則豈識高相國？希孝復詰其蟒袴刀劍曰：馮家僕辛儒所予，保益懼。希孝曰：爾欲污獄使耶？遂罷。保密飲大臣生漆酒瘡之，而內以拱行刺事上聞。有般內監者，年七十餘，奏上曰：高拱故忠臣，何爲有此？隨顧保曰：高鬚子是正直人，張居正故懷忌刻，必殺之。我輩內官，何須助彼保大沮，而內監張宏亦力言不可。於是上下刑部擬罪，竟論大臣斬。拱被居正齟齬，杜門屏居。仕宦中州者，不敢過新鄭，率枉道他去。六月，張居正上言稽劾章奏，隨事考成。有遷延隱蔽者，卽舉劾上徙之。冬十月，上御文華殿，張居正進講，言及宋仁宗不喜珠飾，上曰：賢臣爲寶珠玉，何益？居正曰：明君貴五穀而賤珠玉，五穀養人，珠玉饑不可食，寒不可衣。上曰：然，宮人好冶粧，朕歲賜未嘗不節省。居正曰：皇上言及此，社稷生靈之福也。上又曰：秦始皇銷兵，挺可傷人，何銷兵爲？居正曰：人君布德修政，以結民心爲本。天下之患，每出所防之外。秦亡於戍卒，故天時不如地利，地利不如人和。上曰：然，人定真能勝天也。

二年春正月，大學士張居正請上引見廉能官，倣祖宗午朝之儀。從之。甲午，上御皇極門，引見朝覲清廉卓異浙江布政使謝鵬舉等二十五人，特加獎勵，各賜金幣并宴。張居正進講章疏略曰：義理必時習而後能悅，學問必溫故而知新。臣今將今歲所進講章重復刪定，大學一冊，虞書一冊，通鑑四冊，進呈睿

覽雖淺近之言。然亦行遠登高之一助。四川西南都蠻平。初隆慶時。都蠻作亂。張居正薦會省吾往討之。省吾有偉略。而四川總兵劉顯以在閩事被彈。居正曰。臨敵易將。兵家所忌。倘蜀事不效。當并閩事逮治之。於是顯奮不顧身。受省吾方略。以平蠻自效。凡六越月。諸寨悉平。俘蠻長三十六人。拓地四百里。上御文華殿。講畢。問建文果出亡否。張居正曰。國史不載。但故老相傳。披緇雲遊。題詩於田州。有流落江湖。四十秋之句。上太息。命錄詩進。居正曰。此亡國之事。不足觀也。請錄皇陵碑及高皇御製集以上。見創業之艱。聖謨之盛。明日。輔臣進皇陵碑。上覽畢。謂居正曰。朕覽碑。讀之數過。不覺感傷欲泣。居正曰。祖宗當日艱難。蓋以天心爲心。故能創制顯庸。皇上以聖祖之心爲心。乃能永保洪業。因述聖祖微時事。及即位勤儉。上愴然曰。朕敢不黽勉法祖。然尙賴先生輔導也。秋九月辛巳。刑部請錄囚。慈聖太后欲停之。上問張居正。對曰。春生秋殺。天道之常。皇帝即位以來。停刑者再矣。稂莠不除。反害嘉禾。凶惡不去。反害良民。上爲請太后從之。十二月壬子。張居正率大臣上御屏。屏繪天下疆域及職官姓名。用浮帖以便更換。上命設於文華殿後。時加省覽。閏十二月丁亥。上御書弼子一人。永保天命。賜張居正。明日。居正侍進諫曰。帝王之學。當務其大。自堯舜至唐宋賢主。皆修德行政。治世安民。不以一藝。漢成帝知音律。能吹簫度曲。梁武帝。陳後主。隋煬帝。宋徽宗。皆能文善書畫。無救於亂亡。則君德之大。豈沾沾一藝哉。他日上日講畢。問居正。元夕煙火。驚山祖制乎。曰。非也。成化間。以奉母后。時多諫阻。今新政宜裁。上曰。然。居正曰。明年雖禫。繼此當大昏。又皇弟潞王出閣。諸公主釐降。所費甚煩。宜預節省。上曰。朕極知民窮。居正請減元日賜賚。上大然之。上又嘗語輔臣曰。昨日禁中花盛開。侍母后賞宴甚歡。蓋指慈甯也。居正奏曰。仁

聖太后處多時寂寞。惟皇上念之。起還宮。白慈聖。卽自駕往迎。仁聖過大內賞花。傳觴歡宴而罷。  
三年夏五月。大學士張居正上言。近郡縣入學太濫。宜敕學臣量加裁省。并敕吏部凡所在督學臣。非方正勿遣。遼東告警。上深以爲憂。張居正對曰。暑月非北騎狂逞之時。必無慮。旣而薊遼總兵戚繼光報稱諸部解散無警。居正因上疏論邊事曰。昨遼東撫臣張學顏報稱寇衆二十餘萬。謀犯遼東。前鋒已抵大甯。皇上面諭臣。臣已面奏。料其無事。今據總兵戚繼光報稱。寇久解散。臣又使人於宣府。密偵西人青把都動靜。則把都在巢駐牧。未嘗東行。遼東所報皆屬虛聲。臣等因此反切憂慮。夫兵家之要。必知彼已。審虛實而後可以待敵。取勝。今無端聽一訛言。倉皇失措。則是彼已虛實茫然。不知其與風聲鶴唳草木皆兵者何異。敵情狡詐。萬一彼常以虛聲恐我。使我驚惶疲於奔命。久之懈弛不備。然後卒然而至。措手不及。是在彼反得先聲後實。多方以誤之之策。而在我顧犯不知。彼已百戰百敗之道。他日邊臣失事。必由於此。故臣等不以寇之不來爲喜。而深以邊臣不知敵情爲慮也。兵部以居中調度爲職。猶貴審察機宜。沈謀果斷。乃能折衝樽俎。坐而制勝。今一聞奏報。使爾張皇。事已之後。又寂無語。徒使君父焦勞於上。以憂四方。豈僅以題覆公牘。謂已畢本兵事耶。乞傳諭兵部。詰以寇情虛實之由。使之知警。并請賑各邊餓卒。俱從之。八月。張居正請增閣臣。許之。卽日進吏部左侍郎張四維爲禮部尚書。入東閣。故事。入閣者止曰同某人辦事。至是。上手注隨元輔入閣辦事。四維恂恂若屬吏矣。十一月。張居正上郊祀圖考。爲書三册。首敘分合沿革之由。次具壇壝陳設。次列儀注樂章。大意遵高皇帝定制。歲一合祀。奉二祖並配上裊答之。

四年春正月。御史劉臺劾大學士張居正專擅威福。如逐大學士高拱。私贈成國公朱希忠王爵。引用張四維。張瀚爲黨。斥逐言官余懋學。傅應禎。罔上行私。橫黷無厭。居正怒甚。見上辭政曰。臣之所處者危地也。言者以爲擅作威福。而臣之所行正威福也。將巽順以悅下耶。則負國。竭公以事上耶。無以逃專擅之譏。伏地不肯起。上下御座。手掖之曰。先生起。朕當責臺以謝先生。詔下臺獄。杖之百。遠戍之。時議藉藉。居正不自安。復具疏爲解。免杖奪職爲民。然心終恨之。後竟置之死。三月戊戌。上御文華殿。言及唐玄宗於勤政樓宴安祿山。上曰。樓名勤政而佚樂何也。張四維曰。玄宗開元之治。有三代風。至天寶荒佚。乃致播遷。居正曰。無論往代。我世宗皇帝初年。西苑建無逸殿。省耕勸農。末年崇尚玄修。不復臨幸。治平之業亦寢。故大寶箴云。民懷其始。未保其終。上嘉納之。五月辛酉。上視朝。張居正等請覽奏章。時閱聖祖所親批疏稿爲法。上曰。然。居正因簡內閣所藏聖祖手諭六十三道。御製四十四道。聖旨并帖共七十道上之。秋七月丁酉。張居正上言。致治之道。莫要於安民。安民之法。莫重於守令。守土牧民者。削下奉上。以希聲譽。奔走趨承。以求薦舉。徵發期會。以完簿書。苟且草率。以道罪責。其實心愛民者。未嘗概見。明春外計。考察舉錯。乃向背所係。惟以安靜宜民爲最。虛文矯飾。雖浮譽素隆。當列下考。居正又請行考成法。有司以徵解爲殿最。於是奉行者督責小民。不勝朴楚。相率爲怨言。然賦以時起。居正上言。近者仰賴皇上愛人節用。京通儲粟。足支八年。太倉銀庫。所積尙少。宜將明年漕糧量折十三。足國裕民。一舉兼得。上從之。時府庫充溢。太僕寺亦積金四百餘萬。冬十月丙子。進張居正左柱國。太傅。仍加伯爵。敕曰。先生親受先朝顧命。輔朕冲年。今四海昇平。實賴匡弼。精忠大勳。言不能殫。惟我祖宗列聖。祐爾子孫。與國咸休。

欽哉。居正固辭伯爵。許之。山東撫按劾昌邑知縣孫鳴鳳貪賄。上怒甚。欲遣逮。張居正曰。貪人固當盡治。但故事俱下臺訊。上曰。然。鳴鳳之婪。乃出進士乎。居正曰。此人惟恃進士。故爾恣肆。若乙科明經。尚有畏忌。今後用人。但問功能。不可拘資格。上深然之。十二月。上御文華殿。舉袍示輔臣曰。此何色也。居正以爲青。上曰。紫也。久而色渝。居正曰。紫易渝。昔皇祖不尙祿服。御衣敝甚。始易。享國長久。未必不由此。願皇上以皇祖爲法。節一衣。民間有數十人得其煖者。輕一衣。民間有數十人受其寒者。不可不念也。時左右亦言民窮。至鬻妻子。應上供。上深然之。

五年春正月庚午。上御文華殿。大學士張居正言。殿之東堂祀伏羲。以下數聖君。皇上所當法也。法古聖。惟在省覽章奏。日閱一二。講明國事。則他年躬攬萬幾。無難矣。上嘉納之。五月戊申。諭修慈慶。慈甯兩宮。張居正言。兩宮於萬歷二年落成。今壯麗如故。足以娛聖母。乃欲壞其已成。更加藻飾。非所急也。請輟工。從之。嶺西羅旁平。羅旁據山海間。驚江急峽。巖壑險絕。諸獠窟穴其中。前代不入版籍。國初甫一定之。世宗朝。諸獠轉相寇掠。不可撲滅。督撫殷正茂。既討平惠潮寇。上疏言。羅旁當誅。廷議不能決。居正毅然言。當誅。舉兵部尚書凌雲翼。請賜璽書。屬之討賊。雲翼瀕行。居正謂之曰。雖鞭之長。不及馬腹。即今兩廣諸獠。雖所在都有。然乘間竊發。要當審所緩急耳。雲翼既至。部諸路兵。號三十萬。八道並進。克木衣山。破諸峒五百六十。有四俘斬四萬二十。有奇。拓地數百里。置郡縣。捷聞。賜賚有差。先是。四方多草竊。有司祕不以聞。張居正特嚴其禁。匿盜者。雖循吏必黜。得盜。即報決。有司懷懼。盜亦衰止。閏八月丁亥。上視朝。張居正因言。近因陰雨。朝講暫輟。恐中外不知。謂皇上勤學。漸不如初。願日慎一日。非有他事。及風

雨不得輟。上深然之。九月，上諭停刑。蓋慈聖太后以大昏期近也。居正上言：春生秋殺，天道所以運行。雨露霜雪，萬物因之發育。明王奉若天道，刑賞予奪，皆奉天意以行事。若棄有德而不用，釋有罪而不誅，則刑賞失中，慘舒異用矣。且臣近詳閱所開諸犯，皆逆天悖理，其所戕害，含冤蓄憤，聖主明王不爲一泄。彼以其怨恨冤苦之氣鬱而不散，或上蒸爲妖沴氛祲之變，下或致凶荒疫癘之疾，則其爲害又不止一人一家也。請俟明年吉典告成，然後概免一年。從之。己卯，張居正父喪訖，至上以手諭寬慰，視粥止哭。絡繹道路，又與三宮賻贈甚厚。然亦無意留之。所善同年李幼孜等倡奪情之說，於是居正惑之。乃外乞守制，示意馮保使勉強留焉。冬十月，居正再上疏乞終制不允。乃請在官守制，不造朝。許之。居正既父喪奪情，吉服視事，編修吳中行檢討趙用賢因星變陳言，刑部員外艾穆主事沈思孝合疏言：居正忘親貪位，居正大怒。時大宗伯馬自強曲爲營解，居正跪而以一手撚鬢曰：公饒我，公饒我。掌院學士王錫爵徑造喪次爲之解。居正曰：聖怒不可測。錫爵曰：即聖怒亦爲公語未訖。居正屈膝於地，舉手索刃作刎頸狀曰：爾殺我，爾殺我。錫爵大驚趨出。十月二十二日，中行等四人同時受杖。中行用賢即日驅出國門，人不敢候視。許文穆方以庶子充日講，鐫玉杯一曰：班班者何？卞生淚。英英者何？蘭生氣。追追琢琢，永成器。以贈中行。鐫犀杯一曰：文羊一角，其理沈黜，不惜刻心，寧辭碎首。黃流在中，爲君子壽。以贈用賢。穆思孝復加鐫鎖，且禁獄。越三日，始僉解發戍。爲更慘毒。時鄒元標觀政刑部，憤甚，視四人杖畢而疏上。越三日，受杖。謫戍貴州都勻衛。罷吏部尚書張瀚。先是，瀚爲南京工部尚書，廷推吏部。瀚名第三，以居正言上。越次用之。居正以爲德，希瀚報奪情議起，遂邀中旨屬瀚留居正。居正亦自爲牘風之使留己。瀚若不喻其意。

者謂政府奔喪當以殊典卹之。宗伯事也。何關吏部。居正乃令所善客說瀚。瀚不聽。又不欲顯居其名。乃借三尚書密晤居正。動以微言。居正大不悅。於是。有詔切責瀚。謂瀚奉諭不復。無人臣禮。是時。廷臣爭惴惴。各倡保留之議。瀚拊膺太息曰。三綱淪矣。居正益怒。嗾臺省劾之。以爲昏耄。勒令致仕。丙午。上戒諭羣臣曰。奸邪小人。藐朕冲年。忌憚元輔。乃借綱常之說。肆爲誣論。欲使朕孤立於上。得以任意自恣。茲已薄處。如或黨奸懷邪。必罪不宥。時言奪情者得罪。都人士皆憤怒。作謗書懸長安門。謂居正且反。上聞之。故宣諭於朝。謗議稍息。已而召居正於平臺。慰諭甚至。卽日入直。初。居正喪次。凡閣中事。令吏費奏就擬。虞分。手詔稱元輔。稱太師。稱先生。皆盡古師臣之禮。十一月癸丑朔。以星變。考察羣臣。始。張居正自矯飾。雖或任情。而英敏善斷。中外羣譽之。居正亦自負不世出。迨劉臺論居正得罪。志意漸恣。至是。益知天下不見與。思威權刦之矣。令天下度田。國初。天下土田八百五十萬頃。至後漸減。歲久滋僞。豪民有田不賦。貧民曲輸。爲累民窮。逃亡故額。頓減。張居正請科田。凡莊田民田。職田蕩地。牧地。皆就疆理。無有隱。其撓法者。下詔切責之。

六年春正月。將舉大昏。首輔張居正充納采問名副使。給事中李濂疏言。居正有服制。不宜與執事。乞改命。上不允。以聖母諭。居正遂從吉。三月甲寅。張居正乞歸治葬。許之。辭朝。上召見於平臺。勞諭之曰。朕不能捨先生。恐重傷先生懷。是以忍而允所請。雖然。國事至重。朕將焉依。居正奏言。皇上大昏之後。宜擯節愛養。留心萬幾。因伏地而哭。上亦爲之哽咽。墮淚曰。先生雖行國事。尚宜留心。乃賜銀印曰。帝寶。忠良。令得密封言事。進辭兩宮。各賜贖金。慰諭有加。庚辰。遼東再奏大捷。上歸功張居正。使使馳諭。俾定。



爵賞以聞。召還遠朝。居正以母老。俟秋上道。命錦衣歸馳趣之。六月乙未。張居正還朝。上召見於文華西室。問沿途所見稼穡何如。民生何如。邊事何如。居正對甚悉。上大悅。賜休沐十日。十二月。命纂宗藩要例書頒示諸王。先是。世宗朝。公族繁盛。國用困竭。以故頗加損抑。至是。居正等念諸藩裁削。非天子親親意。乃略舉事例。未當者十一條。請敕禮官集議。著爲令。諸藩於是感激親上。而厚薄親疏有體矣。七年二月。上患疹。慈聖太后命僧於戒壇設法度衆。張居正上言。戒壇奉皇祖之命。禁止至今。以當時僧衆數萬。恐生變敗俗也。今豈宜又開此端。聖躬違豫。惟告謝郊廟社稷。斯名正言順。神人胥悅。何必開戒壇而後爲福哉。事遂寢。二月。河工成。先是。淮安有水患。河決入淮。淮勢不敵。淮揚咸爲巨浸。直逼泗州。患近陵寢。上以問張居正。因上言。故河道都御史潘季馴可使。乃降璽書卽其家。拜都御史。使持節治河。一切假以便宜。久任。帑藏不問出入。諸奉行不及事者。下詔獄鞫治之。於是當事者日夜焦勞。蓋踰年而堤成。轉漕無患。三月上疹愈。徵光祿寺十萬金。張居正上言。財賦有限。費用無窮。使積貯空虛。不幸有四方水旱之災。疆場意外之變。可爲寒心。此後望力加撙節。若再徵金。臣等不敢奉詔矣。時上漸備六官太倉所儲。屢有宣進。居正上戶部所進御覽錢糧數目。請置之坐隅。時賜省覽。量入爲出。因言。萬歷初年所入四百三十五萬有奇。六年所入僅三百五十五萬有奇。則已少八十餘萬矣。五年歲出四百四十九萬有奇。則已多四十餘萬矣。夫歲出則浮於前。歲入則損於前。此不可不留心也。王制。量入爲出。計三年之出。必有一年之餘。而後可。况財用止有此數。設法巧取。不能增多。惟加意撙節。則用自足。上嘉納之。夏四月。上以內庫缺錢。賞賚不足。命部鑄大錢。以進。張居正上言。先朝鑄錢呈式。非供上用也。萬歷二年。

進錢一千萬。其後歲半之。已非本意。若闕錢鑄進。是以外府之儲。取供內府。大失舊制矣。上從之。乃罷鑄錢。癸卯。張居正上肅雝殿箴。命書於御屏。五月。封遼東總兵李成梁爲甯遠伯。張居正言成梁屢立戰功。忠勇爲一時冠。加以顯秩。此鼓勵將士之法也。已而成梁使使餽以金。居正曰。而主以百戰得功勳。我受其金。是得罪高皇帝也。卻不受。七月甲子。給事顧九思。王道成等以江南水災。請罷浙直織造內臣。上以示張居正。居正奏民重困。宜召還孫隆。上曰。彼織幣且完。當俟來春耳。居正曰。地方多一事。則有一事之擾。寬一分。則受一分之惠。災地疲民。不堪催督。暫去之。俟稍稔可復也。上從之。時給事中李涿請卹江南水災。并言四事。上怒其譏訕。居正曰。水災請卹。亦言官之常。雖或觸忤。恐傷聖度。上意乃解。冬十月。薊遼總督梁夢龍報土蠻大舉入寇。張居正奏言。臣諭邊臣。如敵騎入。勿輕戰。堅壁清野。野無所掠。彼將自阻。請令夢龍駐永平。戚繼光駐一片石。伺間邀擊。上善之。旣而土蠻以四萬騎犯前屯。梁夢龍李成梁率兵禦卻之。十二月。張居正服闋。召見於平臺。

八年春正月己未。先是。永豐梁汝元聚徒講學。吉水羅巽亦與之游。汝元揚言。張居正專政。當入都頌言逐之。居正微聞其語。授指有司捕治之。已。湖廣貴州界獲妖人曾光。竄入汝元。巽姓名。云謀不軌。汝元巽俱先死。湖廣守臣具爰書下法司訊之。并曾光亦非真也。第據律論罪。三月。大學士張居正具疏乞休。再上。上慰留懇切。最後手書傳慈聖口諭。張先生受先帝付託。豈忍言去。俟輔爾至三十。卻再審處。讓後人非晚也。居正因復就職。甲子。賜進士張懋修等三百人及第出身有差。懋修兄敬修亦成進士。得禮部主事。俱居正子。八月戊子。刑部侍郎劉一儒移書張居正曰。竊聞論治功者貴精明。論治體者尙渾

厚。自明公輔政。立省戒之典。復久任之規。申考憲之條。嚴遲限之罰。大小臣工。鯁鯁奉職。治功既精明矣。愚所過慮者。政嚴則苛。法密則擾。今綜覈既詳。弊端別盡。而督責復急。人情不堪。非所以培元氣而養敦渾之體也。昔臬陶以寬簡贊帝舜。姬公以惇大告成王。淪洽當代。矩矱後世。願明公法之。居正得書不懌。十一月戊寅。上以夜宴。惑於內侍孫海客等。撻二內使幾斃。慈聖太后聞之。切責上。令取霍光傳入覽。上悔悟。降孫海客等。明日。上諭閣臣。朕在冲年。自多過愆。惟藉諸先生力諫。使朕爲堯舜之君。張居正因奏諸內臣老成廉慎者存之。諂佞放恣者汰之。皇上亦宜痛改。戒宴飲以重起居。專精神以廣繼嗣。節賞賚以省浮費。卻玩好以定心志。親萬幾以明庶政。勤講學以資治理。端趨向以肅士風。則聖德愈光矣。上深嘉納之。十二月甲辰。張居正請屬儒臣以累朝寶訓實錄。分四十餘則。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去奸邪。曰納諫。曰守法。曰敬戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農。曰興教化。曰明賞罰。曰信詔令。曰謹名分。曰卻貢獻。曰慎賞賚。曰甘節儉。曰慎刑獄。曰褒功德。曰屏異端。曰飭武備。曰禦寇盜。仍敕次第進呈。俟明年開講。其諸司章奏切要者。卽講畢面裁。時上留意翰墨。居正以爲筆札小技。非君德治道所係。故有是請。上嘉納之。九年春正月。大學士張居正請令翰林分番入直。應和文章。或令侍上清譏。質問經義。陳說治理。如唐宋故事。夏四月辛亥。上御文華殿。張居正以給事中傅作舟疏進覽云。今江北淮鳳及江南蘇松連被災。傷民多乏食。至以樹皮充饑。或相聚爲盜。大有可憂。上曰。淮鳳頻年告災。何也。居正對曰。此地從來多荒。

少熟元末之亂皆起於此。今當破格賑之上曰然。居正極言。今有司負職。如積穀一事。屢旨申飭。竟成虛文。上作色曰。有司忽民。宜重處之。居正曰。以後犯者。當如聖諭。又曰。江南北旱。河南風災。畿內不雨。勢將蠲賑。惟皇上量入爲出。加意撙節。如宮費及服御。可減者減之。賞賚可裁者裁之。至若施舍緇黃。不如下吾赤子也。上曰然。今宮費俱節。賞賚不溢。居正曰。皇上謂從舊亦近例耳。如今年暫行。明年卽爲例。非祖制也。臣不敢彙引。如皇祖用度最繁。然內帑尙有餘積。隆慶初。庫貯尙百餘萬。今歲入百二十萬。猶稱乏。惟皇上省察。上是之。十一月。張居正一品考滿。賜金幣及酒果甚厚。手敕褒諭。有精忠大勳。言不能盡。官不能酬之語。加上柱國。太師。支伯。傅。俸。居正固辭。允之。

十年二月丁酉。大學士張居正上言。安民之道。在察其疾苦。今尙有一事爲民害者。帶徵稅糧也。夫百姓財力有限。一歲之入。僅足供一歲。不幸歲歉。目前尙不能辨。豈復有餘力。更完累歲積逋乎。有司避責。往往將今年所徵抵完舊逋。卽今歲所欠。又爲將來帶徵矣。況徵輸額緒繁多。年分淆雜。小民竭脂膏。胥吏飽溪壑。甚者不肖。有司因而漁獵。夫與其朘民以實奸貪之囊。孰若盡蠲以施曠蕩之恩。乞諭戶部覈萬歷七年以前積負。悉行蠲免。將見年正額責令盡完。在百姓易辦。在有司易徵。是官民兩利也。上從之。詔下。中外大悅。三月丁卯。張居正有疾。求私宅。稟擬從之。六月甲午。居正以疾再乞休。不允。上以細務委張四維。大事卽居正家平章。以遼左大捷。斬速把孩功。進張居正太師。甲辰。上遣司禮太監費手。敕諭張居正曰。聞先生糜飲不進。朕心憂慮。國家大事當一一爲朕言之。居正力疾疏謝。并上密奏。薦禮部尙書潘晟。吏部左侍郎余有丁。明日上。卽命二人入閣。丙午。大學士張居正卒。上震悼。輟朝。遣司禮太監

張誠監謫喪事。賜賻甚厚。兩宮太后及中宮俱賜金幣。賜祭十六壇。贈上柱國。諡文忠。居正性深沈。機警多智。數爲史官。時嘗潛求國家典故。及時務之切要者。剖晰之。遇人多所諮詢。及攬大政。登首輔。慨然有任天下之志。勸上力行祖宗法度。上亦悉心聽納。十年來海內肅清。用李成梁。戚繼光。委以北邊。攘地千里。荒外警服。南蠻累世負固者。次第遣將削平之。力籌富國。太倉粟可支十年。問寺積金至四百餘萬。成君德。抑近倖。嚴考成。覈名實。清郵傳。核地畝。一時治績炳然。惜其褊衷多忌。剛復自矜。初入政府。即以私憾廢遼王。久直。信任奸佞。好諛成風。六曹之長咸唯唯聽命。至章疏不敢斥名。第稱目輔。始譽以伊。周漸進。以五臣。且諛之舜。禹。居正亦恬然居之。而中允高啓愚。至以舜亦以命禹。題試士。當時目爲勸進。居正卒。餘威尚在。言官奏事。尚稱先太師。方奪情時。威權震主。上雖虛己以聽。而內顧不堪。身死未幾。遂遭削奪。并籍其家。子孫皆不保云。初。上在講筵。讀論語。色勃如也。誤讀作背字。居正忽從旁厲聲曰。當作勃字。上悚然而驚。同列皆失色。上由此憚之。及居正卒後。蒙禍。時比之霍氏之驂乘。御史郭維賢疏薦吳中行等降調。然上意已漸移。御史楊寅秋劾王國光。罷之。發馮保南京閒住。吳中行。趙川賢。艾穆。沈思孝。王用汲。余懋學。朱鴻謨。趙應元。傅應禎。趙世卿。鄒元標。俱復官。會潞王昏禮所需珠寶未備。太后間以爲言。上曰。辦此不難。年來廷臣無恥。盡獻張馮二家耳。太后曰。已抄沒矣。必可得。上曰。保黠猾。盡竊而逃。自此內中張先生。張太岳稱謂絕以爲諱。而籍沒之舉亦胎於此。

十一年。上從遼府次妃王氏奏請。籍沒張居正家。其產不及嚴嵩二十分之一。株連頗多。荆川騷動。上曰。遼府廢革。既奉先帝宸斷。又無應繼之人。着推舉親枝。以本爵奉祀。仍準王歸葬原封。抱養子述。璽準依

親居住。給與糜糧二百石。本折中半支。王氏從厚。援徽府例贍養。張居正誣讎親藩。箝制言官。蔽塞朕聰。私占廢遼地畝。假以丈量遮飾。騷動海內。專權亂政。罔上負恩。謀國不忠。本當斷棺戮尸。念效勞有年。姑免盡法。伊屬張居易。張嗣修。張順。張書俱令燬瘞。地面充軍。

谷應泰曰。聞之虞書良弼。義取協恭。秦誓个臣。都無他技。蓋下吏奉職。乃在才具。而端揆裁物。則在度量。卿貳奔奏。不越章程。而宰相坐論。必資道術也。矧承平之相。與創制異。冲人之相。與長君異。周公以惇大告成王。韓琦以才偏貶公著。凡以養蒙作聖。不專在於宣之綜核。明之察察耳。世稱張居正相業。譽者或許其幹略。毀者僅惡其專恣。然予以皆非事實。真知居正者也。考居正大節。特傾危陷刻。忘生背死之徒耳。而其他緣飾以儒術。眩曜以智數。譬之黃子艾牆高基。卜陽處父華而不實。求其論思密勿之地。表帥百寮之間。此實難矣。方夫穆宗憑几。顯帝冲齡。居正拱儀。同受顧命。而內臣馮保竊叢於側。斯時逐刁之議未行。弔讓之謀潛固。賈交附璫。漏言市重。彼商鞅之因景監。相如之藉繆賢。揆之結主。固如是乎。卒之會極傳宣。新鄭被斥。而馮保以快己之怨者。卽以酬次輔之恩。居正以去保之疾者。還以固綸扉之寵。鸞權夸毗。若互市然。及乎九齡遠引。頤浩外徙。始乃宮府交通。更唱迭和。馮倚執政。則言路無憂。張恃中涓。卽主恩罔替。以故扇殿清暑。鋪氈禦寒。居正所蒙。壹皆媚璫之力也。至於犯蹕具獄。詞連拱奴。謀發宰臣。風生內侍。苟非天變見於上。公議格於下。則上官黠詐。立碎奉車。易之飛文。赤誅魏氏。居正之包藏禍心。傾危同列。真狗彘不食其餘矣。若夫父喪奪情。太阿不釋。李幼孜倡之於外。馮保應之於內。而居正貌乞持服。心冀慰留。無魯伯禽之東郊不啓。蹈翟方進之脫衰視事。語云求忠於孝。又云移孝作忠。居正其無

人心者乎。何相倍之戾也。矧乃三月歸葬。六月還朝。幸我之意。惟在短喪。曹瞞之心。恐失兵柄。而且吳中行。趙用賢俱以星變陳言。艾穆。沈思孝。鄒元標各以忘親入告。乃復橫被鎖鑰。咸加杖戍。又且論死劉臺。瘼斃七期。錫爵以刳頸驚奔。張瀚以拊膺被斥。雖王巨君之芟除忤恨。梁將軍之收拷太史。淫刑以逞。不是過也。又况懋修。敬修。非列巍科。則躋清秩。是豈向歆之學。冠於漢廷。抑亦京條之派。相援宋室乎。蓋至身死踰年。遼妃訴闕。而東園祕器。甫賜泉門。緹騎金吾。旋圍府第。匪漢元虧師傅之恩。亦田蚡貽滅族之釁也。乃論者以居正之爲相也。進四書經解。而聖學修明。進皇陵碑。帝鑑圖。而治具克舉。請詞林入直。而清讜無荒。請宮費裁省。而國用以裕。任會省吾。劉顯。而都蠻悉平。用李成梁。戚繼光。而邊陲坐拓。厥罪雖彰。功亦不泯焉。然予以居正救時似姚崇。徧徼則似趙普。專政似霍光。剛鷲則類安石。假令天假之年。長轡獲騁。則吏道雜而多端。治術疵而不醇。斯豈貞觀之房。杜。而元祐之司馬乎。更可異者。自居正以錢穀爲考成。而神宗中葉。大啓礦稅。居正以名法爲科條。而神宗未造。叢脞萬幾。嗚呼。手實之禍。萌自催科。申商之後。流爲清靜。則猶居正之貽患也。

卷六十二

援朝鮮

神宗萬歷二十年五月。倭酋平秀吉寇朝鮮。平秀吉者。薩摩州人僕也。始以魚販臥樹下。有山城州倭渠名信長。居關白職位。出獵遇吉。欲殺之。吉善辨。信長收令養馬。名曰木下人。信長賜與田地。於是爲信長

書策。遂奪二十餘州。會信長爲其參謀。阿奇支刺殺吉乃。統信長兵。誅阿奇支。遂居關白之位。因號關白。以誘劫降六十六州。朝鮮金山與日本對馬島相望。時有倭戶往來互市。通婚姻。時朝鮮王李昞瀕於酒。弛備。吉乃分遣其渠行長。清正等率舟師數百艘。逼釜山鎮。五月。潛渡臨津。分陷豐德諸郡。時朝鮮承平。久怯不諳戰。皆望風潰。朝鮮王倉卒棄王京。令次子瑄攝國事。奔平壤。已復走義州。願內屬。倭遂渡大同江。繞出平壤界。是時倭已入王京。毀墳墓。劫王子。陪臣。剽府庫。蕩然一空。八道幾盡沒。且暮。且渡鴨綠。請援之。使絡繹於路。廷議以朝鮮屬國。爲我藩籬。必爭之地。遣行人薛潘諭其王。以匡復大義。揚言大兵十萬。已擐甲至。賊抵平壤。朝鮮君臣勢益急。出避愛州。七月。游擊史儒等師至平壤。不諳地利。且霖雨。馬奔逸不止。儒戰死。副總兵祖承訓統兵三千餘。渡鴨綠江。援之。僅以身免。報至。朝議震動。以宋應昌爲經略。員外劉黃裳。主事袁黃贊畫軍前。八月。倭人豐德等郡。我兵稍集。而行長等頗習兵。詐謂不敢與中國抗。以緩我師。兵部尚書石星亦謂諸將未得利。計無所出。議遣人探之。嘉興人沈惟敬應募。惟敬者。市中無賴也。是時平秀吉次對馬島。據王京。分其將行長等各發兵守要害爲聲援。惟敬至平壤。行長令牙將以肩輿迎之。時平秀吉廢山城。君自號大閩王。惟敬至。執禮甚卑。行長詭曰。天朝幸按兵不動。我亦不久當還。當以大同江爲界。平壤以西盡歸朝鮮耳。惟敬既還。奏廷議以倭多變詐。未可信。我師利速戰。乃趣應昌等統兵進擊。而石星頗惑之。以惟敬緩急可任。題假游擊赴軍前。且請金行開。八月。布衣程鵬舉請發暹羅兵自海道擣其巢穴。時以爲奇策。又朝議調播州楊應龍援朝鮮。十二月。以李如松爲東征提督。上憫東征將士寒苦。特發帑金十萬犒慰。且重懸賞格。先是宋應昌抵山海關。士馬芻糧徵調未



集而大將軍李如松甫平西夏亦未至軍。因謬借惟敬糜倭西向。前所羽檄徵兵七萬餘。至者半。乃置三軍。以副將李如柏將左。張世爵將右。楊元將中軍。趨遼陽。至是。如松始至軍。而惟敬歸自倭。稱行長願退。平壤迤西。以大同江爲界。如松大會將吏。叱惟敬檢邪當斬。參軍李應試請問曰。藉惟敬給倭封而陰襲之。奇計也。應昌如松以爲然。乃置惟敬標營。二十五日。誓師東渡。如松將諸鎮士馬四萬餘。東由石門度鳳凰山。馬皆汗血。臨鴨綠江。天水一色。望朝鮮萬峯出沒雲海。監軍劉黃裳慷慨誓曰。此汝曹封侯地也。二十一年正月。平壤大捷。初沈惟敬三入平壤。約以正月七日。李提督齎封典過肅甯館。至是。初四日。我師抵肅甯。行長遣牙將二十人來迎。如松檄游擊李甯生縛之。倭猝起格鬪。僅獲三人。餘走還。告行長。行長問惟敬曰。此必通事兩誤耳。行長令親信小西飛禪守籐。隨惟敬謁如松。如松加撫遣歸。六日。抵平壤。行長屹風月樓。候瞻龍節。倭俱花衣。夾道迎候。如松分布將士。營入城。諸將遂巡未入。形已露。倭悉登陣拒守。如松度地形。東南竝臨江。西枕山陡立。惟迤北牡丹臺高聳最要。三倭列拒馬地。礮以待。遣南兵試其鋒。佯退。是夜。倭襲李如柏營。擊卻之。如松因部勒諸將。諭無割級。攻圍止。缺東面。屬游擊吳惟忠攻牡丹峯。陰取西南。以倭易麗兵。令祖承訓等詭麗裝潛伏。八日黎明。鼓行抵城下。攻其東南。倭矢如雨。軍稍卻。松如手斬先退者以徇。募死士援梯鉤而上。殺數人。不退。倭悉力拒守。倭方輕。南面爲麗兵承訓等。乃卸裝露明甲。倭急分兵拒堵。如松已督楊元等從小西門先登。李如柏等亦從大西門入。火藥並發。毒煙蔽空。方戰時。吳惟忠中鉛洞胸。猶奮呼督戰。而如松坐騎斃於礮。易馬馳。墮塹。鼻出火。麾兵愈進。我師無不一當百。前隊賀首。後勁已踵。突舞於堞。倭退保風月樓。夜半。行長提兵渡大同江。遁還龍山。是役

凡得級千二百八十五餘。死於火及從城東跳溺無算。裨將李寧、查大受等率精兵三千潛伏江東僻路。獲級三百六十二。生擒三倭。乘勝追襲。十九日。李如柏進復開城。得倭級百六十五。朝鮮郡縣如黃海、平安、京畿、江源四道並復平。歸平壤。惟咸鏡道爲清正拒守。聞開城破。亦奔王京。王京爲朝鮮都會。咸鏡忠清爲之犄角。頗據天險。而援師旣連勝。有輕敵心。二十七日。去王京七十里。朝鮮人以倭棄王京遁告如松。信之。將輕騎趨碧蹄館。去王京三十里。馳至大石橋。馬蹶。傷額幾斃。倭猝至。圍之數重。將士殊死戰。自巳至午。彀中矢且盡。金甲酋前搏李將軍甚急。裨將李有昇以身蔽如松。刃數倭。竟中鈎墮。爲倭支解。李如柏、李甯乃益遮夾擊。李如梅、箭中金甲倭。墜馬。會楊元援兵至。砍重圍入。遂潰。而我精銳亦多喪。失過橋者盡死。天且雨。近王京平地俱陷。哇冰解。泥深。騎不得聘。倭背山面水。連珠布營。城中廣樹飛樓。鳥銃自穴中出。應時斃。我師乃退。駐開城。三月。經略宋應昌檄劉綎、陳璘、水陸濟師。上益發帑金二十萬佐軍興。時諜者言王京倭二十萬。且聲言關白揚帆入犯。李如松分留李甯等駐開城。楊元等軍平壤。掘大同江接餉道。李如柏等軍寶山。諸處爲聲援。查大受等軍臨津。而將銳卒東西策應。聞倭將平秀嘉據龍山。倉粟數十萬。從間道縱火盡焚之。倭乏食。東師議款。初。我師捷平壤。鋒甚銳。轉戰開城。勢如破竹。及碧蹄之敗。久頓師絕域。氣益索。經略宋應昌急圖成功。於是惟敬之款始用。而倭芻糧並盡。行長亦懲平壤之敗。有歸志。因而封賁之議起。經略旣得請於朝。赦不窮追。且得倭報惟敬書。乃益令游擊周宏謨同惟敬往諭倭獻王京返王子。如約縱歸。倭果於四月十八日棄王京遁。如松及應昌整衆入城。所餘米四萬餘。芻豆稱是。如松以兵臨漢江尾。倭後欲乘情歸擊之。而倭步步爲營。用分番迭休法以退。別將劉綎

帥兵五千趨尙州鳥嶺。鳥嶺廣互七十餘里。懸崖鐵削。中通一道如線。灌木叢雜。騎不得成列。倭尙拒險。而別將查大受、祖承訓等由間道踰槐山。出鳥嶺後。倭大驚。前移釜山浦。築居屯種。爲久戍計。我師乃張疑兵。分遣劉綎、祖承訓等屯大邱、忠州。檄調全羅水兵龜船分布釜山海口。時倭已棄王京。漢江以南千有餘里。朝鮮故土奄然還定。兵科給事中侯慶遠謂我與倭何讐。爲屬國勤數道之師。力爭平壤。收王京。掣兩都授之。存亡興滅。義聲振海外矣。全師而歸。所獲實多。上乃諭朝鮮王還都王京。整兵自守。我各鎮兵久疲海外。以次撤歸。應昌復疏稱釜山雖瀕南海。猶朝鮮境。有如倭覘我罷兵。突入再犯。朝鮮不支。前功盡棄。考輿圖朝鮮幅員東西二千里。南北四千里。從西北長白山發脈。南跨全羅界。向西南止日本對馬島。偏在東南。與釜山對。倭船止抵釜山鎮。不能越全羅至西海。蓋全羅地界直吐正南。迤西與中國對峙。而東保薊遼。與日本隔絕不通海道者。以有朝鮮也。關白之圖朝鮮。意實在中國。我救朝鮮。非止爲屬國也。朝鮮固則東保薊遼。京師鞏於泰山矣。今日撥兵協守爲第一策。卽議撤宜。少需時日。俟倭盡歸。量留防戍。部覆南兵暫留分布朝鮮。量簡精兵三千善後。餘盡撤如前議。六月。沈惟敬歸自釜山。同朝使小西飛禪守藤來請款。而倭隨犯咸安晉州。逼全羅。聲復江漢以南。以王京漢江爲界。李如松計全羅沃饒。南原府尤其咽喉。乃命李平胡、查大受鎮南原。祖承訓、李甯移南陽。劉綎移陝川。已。倭果分犯我師。並有斬獲。兵科給事中張輔之謂倭聚釜山。原佯退誘我撤兵。圖漸逞。無故請貢。非人情。今猝犯晉州。情形已露。宜節制征剿。遼東都御史趙耀亦報款貢不可輕受。七月。倭從釜山移西生浦。送回王子陪臣時。我師久暴露。聞撤勢難久羈。宋應昌乃請戍全羅。慶尙議留劉綎川兵五千。吳惟忠略尙志南兵二千六

百合薊遼共萬六千人聽劉綎分布慶尙之大邱而兵部尙書石星一意主款謂留兵轉餉非策應昌師老無成功亦願弛責然策倭多詐恐兵變生已而命沈惟敬復入倭營促謝表急圖竣役乃并撤吳惟忠等兵止留綎兵防守諭朝鮮世子臨海君瑄居全慶督師以顧養謙總督遼左九月兵部主事曾偉芳言倭款亦去不款亦去款亦來不款亦來蓋關白大衆已還行長留待知我兵未撤不能以一矢相加遣也欲歸報關白捲土重來則風帆不利正苦冬寒故曰款亦去不款亦去沈惟敬前倭營講戚安晉州隨陷而欲恃款冀來年不攻則速之款者速之來耳故曰款亦來不款亦來爲今日計宜令朝鮮自爲守弔死問孤練兵積粟以圖自強章下部十月總督顧養謙力主撤兵許之因疏請封貢上命九卿科道會議時御史楊紹程奏臣考之太祖時屢卻倭貢慮至深遠永樂間或一朝貢漸不如約自是稔窺內地頻入寇掠至嘉靖晚年而東土受禍更烈豈非封貢爲厲階耶今關白認爲恭謹奉表請封之後我能閉關拒絕乎中國之覺必自此始矣且關白弑主篡國正天討之所必加彼國之人方欲食其肉而寢處其皮特劫於威而未敢動耳我中國以禮義統禦百蠻而顧令此篡逆之輩叨天朝之名號耶宜急止封議敕朝鮮練兵以守之我兵撤還境上以待之關白可計日而敗也是時廷臣禮部郎中何喬遠科道趙完壁王德完遠中立徐觀瀾顧龍陳維芝唐一鵬等交章止封而薊遼都御史韓取善亦疏倭情未定請罷封貢兵部尙書石星恐不能羈縻關白甚張皇終主封貢不已

二十二年八月總督顧養謙奏講貢之說貢道宜定甯波關白宜封爲日本王請擇才力武臣爲使諭行長部倭盡歸與封貢如約九月朝鮮國王李暉疏請許貢保國上乃切責羣臣阻撓封貢追褫御史郭

實等詔小西飛入朝時改總督侍郎孫鏞新受事倭使抵京石星優遇如王公小西飛等殊揚揚過闕不下既集多官面譯要以三事一勒倭盡歸巢一既封不與貢一誓無犯朝鮮倭俱聽從以聞上復諭於左闕語加周復大略如樞部意十二月封議定命臨淮侯李宗城充正使以都指揮楊方亨副之同沈惟敬往日本時禮部議日本舊有王未知存亡關白或另擬二字或卽以所居島封之行長以下量授指揮銜上竟準日本王號給金印行長授都督僉事適諜報熊川島倭船三十六號業起行歸石星遂謂封事必可成矣

二十三年春正月遼東都御史李化龍疏倭六可疑五可慮謂倭不識漢字恐中間兩相欺給請從禮部量封秀吉順化王罷遣沈惟敬增募水兵而清正素不服關白與行長不相能可用魯運諭燕將計間之時封使已發竟不從

二十四年春正月先是東封之使久懷觀望至是始抵釜山而沈惟敬詭云演禮同行長先渡海私奉秀吉蟒玉翼善冠及地圖武經又囑壯馬三百南戈厓騎從陰獻秀吉取阿里馬女與倭合李宗城執袴子經行之營所在索賄無厭次對馬島太守儀智夜飾美女二三人更番納行帷中宗城安之倭酋數請渡海不允儀智妻行長女也宗城聞其美併欲淫之智怒不許適謝周梓姪隆與宗城爭道宗城欲殺之隆誅其左右以倭將行刺宗城懼棄輿書夜遁比明失路自縊於樹追者解之遂奔慶州副使楊方亨聞於朝上震怒逮問宗城議戰守會方亨復揭倭情無變正使自爲奸人誤耳上以方亨充使加惟敬神機營銜副之廷臣交章請罷封上切責下御史曹學程於理立限渡海於是惟敬益舞智揣摩玩大司馬股掌

矣。三月工部郎中岳元聲參石星力主封事有三辱四恥五恨五難疏入謫爲民。九月楊方亨沈惟敬奉册如日本平秀吉齋沐三日郊迎節使受封行五拜三叩頭三呼禮禮畢款使者備至朝鮮王議遣光海君致賀已而聽嬖臣李德馨言使州判奉白土袖爲賀秀吉怒語惟敬曰若不想二子三大臣三都八道悉遵天朝約付還今以卑官微物來賀辱小邦耶辱天朝耶惟敬慰諭之秀吉曰今留石曼子兵於彼候天子處分然後撤還翼日具貨物數百種奉貢遣使齋表文二通隨册使渡海至朝鮮廷議遣使於朝鮮取表文進驗其一謝恩其一乞天子處分朝鮮廷議以爲飾說云。

二十五年春正月石星請自往朝鮮諭兩國就盟罷兵不許。二月再議東征時封事已壞而楊方亨詭報去年從釜山渡海倭於大版受封卽回和泉州然倭責朝鮮王子不往謝禮又微仍留釜山如故謝表後時不發方亨徒手歸至是沈惟敬始投表文案驗潦草前折用豐臣圖書不奉正朔無人臣禮而寬奠副總兵馬棟報清正等擁二百艘屯機張營方亨始直吐本末委罪惟敬并石星前後手書進呈御覽上大怒命逮石星惟敬按問以兵部尙書邢玠總督薊遼改麻貴爲備倭大將軍經理朝鮮僉都御史楊鎬駐天津申警備楊汝南丁應泰贊畫軍前。五月邢玠至遼行長建樓清正布種島矮窰水索朝鮮地圖玠遂決意川兵麻貴望鴨綠東發所統兵僅萬七千人請濟師玠以朝鮮兵惟閑水戰乃疏請募兵川浙并調薊遼宣大山陝兵及福建吳淞水兵劉綎督川漢兵六千七百聽剿貴密報候宣大兵到乘倭未備竟掩釜山則行長擒清正走玠以爲奇計乃檄楊元屯南原吳惟忠屯忠州大學士張位請屯田開城平壤以資軍興朝鮮恐中國吞併以嶮嶮爲辭議遂寢。六月倭數千艘先後渡海分泊釜山加德安骨

安窟。放丸如雨。殲朝鮮郡守安宏國。已復往來竹島。漸逼梁山。熊川。沈惟敬率營兵二百出入釜山。經略邢玠陽爲慰藉。檄楊元襲執之。縛至貴營。惟敬執而倭嚮導始絕。七月。倭奪梁山。三浪。遂入慶州。侵閑山。夜襲恭山島。統制元均風靡。遂失閑山要害。閑山島在朝鮮西海口。右障南原。爲全羅外藩。一失守。則沿海無備。天津。登萊皆可揚帆而至。而我水兵三千甫抵旅順。閑山破。經略檄守王京西之漢江。大同江。扼倭西下。兼防運道。八月。清正圍南原。乘夜猝攻。守將楊元聞倭至。驚起帳中。乘城跣足而遁。遼人衛楊元西奔。時全州有陳愚衷。忠州有吳惟忠。各扼要。而全州去南原僅百里。相犄角。南原告急。愚衷濡不發兵。聞已破州。民爭棄城走。麻貴急遣游擊牛伯英赴援。與愚衷合兵屯公州。倭遂犯全羅。逼王京。王京爲朝鮮八道之中。東隘爲烏嶺。忠州。西隘爲南原。全州。道相通。自二城失。東西皆倭。我兵單弱。因退守王京。依險漢江。麻貴請於玠。欲棄王京。退守鴨綠江。海防使蕭應宮以爲不可。自平壤兼程趨王京。止之。麻貴發兵守稷山。朝鮮亦調都體察使李元翼。由烏嶺出。忠清道遮賊鋒。玠旣身赴王京。人心始定。玠召參軍李應試。問計。應試請問朝廷主畫。云何。玠曰。陽戰陰和。陽勦陰撫。政府八字。密畫無泄也。應試曰。然則易耳。倭叛以處分絕望。其不敢殺楊元。猶望處分也。直使人諭之曰。沈惟敬不死。則退矣。因請使李大諫於行長。馮仲纓於清正。玠從之。下石星於法司。併沈惟敬俱坐大辟。九月。倭至漢江。楊鎬遣張貞明持惟敬手書往責其動兵。有乖靜俟處分之實。行長正成亦尤清正輕舉。乃退屯井邑。離王京六百里。清正亦退屯慶尙。離王京四百里。貞明反至中途。爲人所刺死。麻貴遂報青山。稷山大捷。蕭應宮具揭上曰。倭以惟敬手書而退。青山。稷山並未接戰。何得言功。玠鎬怒。遂劾應宮。愆法不親解。惟敬並逮。十一月。

總督邢玠徵兵大集。上發帑金犒軍。併賜玠尚方劍。而以御史陳效監其軍。玠大會諸將。分三協。左李如梅。右李芳春。中高策。並以副總兵分將。經理楊鎬。同麻貴。率左右協。自忠州。烏嶺。向東安。趨慶州。專攻清。正使李大諫。通行長約。勿往援。復遣中協屯宣城。東援慶州。西扼全羅。以餘兵會朝鮮。合營由天安。全州。南原而下。大張旗幟。詐攻順天等處。以牽制行長。東援。十二月。會慶州麻貴。遣黃應。賜賄清。正約和。而率大兵。奄至其營。時倭屯尉山。尉山之南。烏山。俱不甚高。而城皆依山險。中一江通釜寨。其陸路由彥陽。通釜山。貴欲專攻尉山。恐釜倭出彥陽來援。令中協高重。吳惟忠等。扼梁山。左協董正誼等。赴南原。張疑兵。又遣右協盧繼忠。兵二千屯西江口。防水路援。二十三日。乃進攻尉山。游擊擺寨。以輕騎誘倭入伏。獲級四百餘。倭盡奔烏山。於前連築三寨。翼日。游擊茅國器。統浙兵先登。連破之。獲級六百六十一。倭堅壁不出。方力攻山寨時。裨將陳寅。身先士卒。冒彈矢勇呼而上。砍柵兩重。清正白袍躍馬督倭拒守。至其第三柵。垂拔。楊鎬。遽令國器。竊割倭級。戰稍解。國器復以李如梅。水至。不便首功。遂鳴金收軍。詰朝。如梅至。攻之不拔。烏山視尉山高。石城新築。堅甚。我師仰攻。多損傷。諸將乃議曰。倭艱水道。餉難繼。第坐困之。清正可不戰縛也。鎬等以爲然。分兵圍十日。夜。倭用礮者。從隙發。多命中。彈皆碎鐵爲之。中多疊傷。然倭亦饑甚。瞰我師稍息。僞約降。緩攻。而冀行長來援。行長亦慮我勢。釜營。不敢輕進。乃選銳卒三千。虛張幟。蔽江上。朝鮮將李德馨。訛報海上。倭船揚帆而來。鎬不及下令。策馬西奔。諸軍無統御。皆潰。清正縱兵逐北。我兵死者萬餘。游擊盧繼忠。三千人殲焉。鎬。貴。奔星州。撤兵還王京。會同邢玠。露布言尉山大捷。諸營上簿書。士卒亡者二萬。鎬大怒。駁正。止稱百餘人。贊畫丁應泰。聞尉山之敗。慚惋。詣鎬問後計。鎬示以內閣。



張位、沈一貫手書，并所票未下旨，揚揚功伐，應泰怒，驗進退情實，首論位一貫交結邊臣，扶同欺蔽，鎬附勢煽禍，飾罪張功及麻貴，李如梅按律悉當斬，并鎬駁改陣亡兵馬卷冊，封進上覽之，震怒欲付法，輔臣趙志皋力救，乃罷鎬聽勘，因遣給事中徐觀瀾查勘東征軍務，上怒張位以其密揭薦鎬，削籍爲民，以天津巡撫萬世德代楊鎬經理遼左。

二十六年春正月，總督邢玠以前役乏水兵無功，乃益募江南水兵，精講海運，爲持久計。二月，督部陳璘以廣兵，劉綎以川兵，鄧子龍以浙直兵先後至，邢玠分兵三協爲水陸四路，路置大將，中路李如梅、東路麻貴、西路劉綎、水路陳璘，各守信地，相機行動。時倭盤據朝鮮七年，沒海千餘里，亦分三窟，東路則清正，據尉山，自去冬攻圍益增，築西生機張，在在屯兵，而特釜山爲根本，西路則行長，據粟林，曳橋建砦，數重，憑順天城，與南海營相望，負山襟水，最據挖塞，中路則石曼子，據泗州，北特晉江，南通大海，爲東西聲援，薩摩州兵剽悍稱勁敵，而行長水師番休濟餉，往來如駛，尤倭繫重，玠懲島山之失，特於三路外置水兵一路，約日並進，尋報遼陽警，李如松敗沒，詔李如梅還赴之，中路以董一元代。九月，東征將士分道進兵，劉綎進逼行長營，使吳宗道約行長爲好，會行長許以五十人往，綎喜，分布諸將四面設伏，令部將詐爲綎，而綎詐爲卒，執壺觴侍，令軍中曰：「視吾出帳，卽放礮圍倭，盡殲之。」翼日，行長果率五十騎來，僞綎罄折迎於帳外，及席，行長顧執壺觴者曰：「此人殊有福。」綎驚愕，置壺觴出，司旗鼓者遽傳礮，行長騰躍上馬，從騎一字鴈列，風翦電掣，旋轉格殺，游擊王之翰急率黔苗兵來援，倭已奪路而去。明日，行長遣人謝宴，綎亦遣官謝，謂昨登席放礮，敬客禮也，誤生疑心，行長唯唯，遣使遺綎以巾幘，綎進攻城，奪其橋，斬首

九十二陳璘舟師協堵擊毀倭船百餘。行長潛出千餘騎扼之。縱不利退。璘亦棄舟走。麻貴至尉山。據險割其糧。頗有斬獲。倭僞退誘之。貴入其空壘。伏兵起。旗幟蔽空。遂敗。董一元進取晉州。乘勝渡江南。連燬永春。昆陽二寨。倭退保泗州。老營屢戰下之。游擊盧得功破於陣前。逼新寨。三面臨江。一面通陸。引海爲濠。海艘泊塞下。千計築金海。固城爲左右翼。中通東陽倉。十月董一元遣步兵游擊茅國器。彭信古。葉邦榮。前攻城。騎兵游擊郝三聘。馬呈文。師道立。柴登科繼之。游擊藍方威攻其東北水門。自辰至未。彭信古用火橫擊寨門。碎城堞數處。步兵競前拔柵。忽營中橫破。火藥發煙漲天。倭乘勢衝殺。固城援倭亦至。郝三聘。馬呈文率騎兵先走。遂大潰。奔還晉州。勘科觀瀾奏四路喪敗。旨下部斬馬呈文。郝三聘以徇。一元等各戴罪立功。初上見丁應泰疏。謂御極二十六年。未見忠直如此人者。書其名於御屏。沈一貫其一。會玉熙宮宦侍演東征劇。熒惑聖聽。上爲之霽顏。復召一貫入閣。福建都御史金學曾報平秀吉七月九日死。各倭俱有歸意。十一月十七夜。清正發舟先走。麻貴遂入島山西浦。劉綎攻奪曳橋。獲級百六十。石曼子引舟師救行長。陳璘統蒼嘯船邀擊之。得級二百二十四。副將鄧子龍朝鮮統制使李舜衝鋒沒於陣。子龍驍將也。諸倭揚帆盡歸。經略萬世德自六月受命。不敢前。比聞倭退。兼程馳至。會同邢玠奏捷。督學御史李堯民知之。因告廟獻俘。上言諸臣欺狀。上艱然。抵疏於几而罷。丁應泰亦再疏賂倭賣國。上念將士久勞苦。仍發問金十萬兩犒師。特諭優敘。勘科徐觀瀾抗疏論沈一貫。蕭大亨。邢玠。萬世德。黨和賣國。疏至京。戶部侍郎張養蒙尼之不得上。時觀瀾方駐遼。造冊身歷釜山。尉山。忠州。星州。南原。稷山。各獲各處敗狀。據實入冊。大亨危之一貫。簡觀瀾前疏有抱痛語。票準回籍調理。改命給事中楊應

文代完勦事

二十七年四月。征倭告捷。上御門受俘。梟磔平秀政。平正成。傳首九邊。總督邢玠劾贊畫主事丁應泰落職。七月。給事中楊應文勸報東征。攻次四路。擒斬首陳璘。次劉綎。又次麻貴。而董一元始破三寨。終掃諸巢。功亦難泯。督邢玠太子太保。蔭一子錦衣世襲。萬世德。陞右副都御史。蔭一子入監。陳璘。劉綎。各加都督同知。麻貴。右都督。董一元復職。再敘稷尉功。賜茅國器。陳寅。彭友德等金。楊鎬。以原官敘用。御史陳效病死。蔭一子錦衣。棄師。楊元。通倭。沈惟敬先後棄市。

谷應泰曰。關白木薩摩州人。倭部之稍黠者耳。非有奇才異能。武勇絕藝。特以李暎縱酒。朝鮮備弛。遂狡焉啓疆。思有吞噬之舉。方其陷王京。劫世子。剽府庫。毀墳墓。八道盡沒。進窺鴨綠。勢岌岌矣。而請援之使絡繹於路。救邢救衛。春秋之義也。况乎勢拱神京。地牽關海。薊遼之外藩。東江之咽喉。一或失守。重險撤焉。非如應龍之反播州。猱羅之陷西川。荒徼弄兵。有傷國體而已。然予以援之之法有三。命武健之將。選精銳之師。出其不意。急擊勿失。如陳湯。甘延壽之於康居。策之上也。其或因糧於敵。分兵斷道。坐而困之。窮蹙日斃。如趙充國之於金城。策之次也。又或始則震以兵威。繼則結以恩義。開誠布信。堅明約束。如諸葛武侯之於孟獲。策之又次也。乃剿旣不足以樹威。而撫又不能以著信。臨事周張。首尾衝決。不可謂非行間之乏謀。而中樞之失算矣。方李如松半壞大捷。李如柏進拓開城。四道復平。三倭生熟。廓清之功。可旦夕竣。而乃碧蹄輕進。兵氣破傷。功虧一簣。良足悼也。又若麻貴。尉山之捷。三協度師。勢相掎角。砍柵拔寨。鋒銳莫當。而割級之令。解散軍威。僉都之肉。豈足食乎。况於沈惟敬。以市井而銜皇命。李宗城。以淫貪

而充正使。以至風月候節之給。壹觴好會之詐。邢玠飛捷之書。楊鎬冒功之舉。罔上行私。損威失重。煌煌天朝。舉動如此。毋怪荒裔之不賓也。向非關白賈惡病亡。諸倭揚帆解散。則七年之間。喪師十餘萬。糜金數千鎰。善後之策。茫無津涯。律之國憲。其何以辭。而乃貪天之功。倖邀爵賞。衣緋橫玉。任子贈官。不亦惡乎。乃馬棟丁應泰之疏。能直伸於關白未死之前。而李堯民之章。反見抵於關白已死之後者。蓋以用兵之初。神宗怒白甚銳。怒則望其速濟。故必欲核其真。用兵既久。神宗憂白漸深。憂則幸其成功。故不欲明其僞。卒之忠言者落職。欺君者封爵。而所遭逢異矣。

### 卷六十三

#### 平倭拜

神宗萬歷二十年二月。甯夏倭拜亂。拜故韃靼種也。嘉靖中。拜得罪其酋長。父兄皆見殺。拜伏水草中。得免。來投守備鄭印。隸麾下。驍勇屢立戰功。歷陞都指揮。拜妻施氏孕將產。拜夢空中大響。天裂出火焰。一妖物如虎入施脅。下不見。拜急手劍之。驚覺。遂產子。狼貌。鼻啼。名曰承恩。萬歷十七年。拜加副總兵。致仕。子承恩襲。十九年。洮河告警。上遣科臣巡九邊。尚寶丞周宏禴以御史往甯夏。舉承恩及指揮王文秀。併拜義子。倭雲等拜。雖請老。居恆多畜蒼頭軍。聲稱報國。會經略鄭洛檄夏鎮調發。巡撫黨馨奉檄。遣文秀率千騎西援。拜驚曰。文秀雖經戰陣。恐不能獨將。乃詣洛轅門。願以所部三千人與子承恩從征。洛壯而許之。聲惡其自薦。馬羸者不與。易有餘馬。亦不給拜。拜怏怏去。至金城。見諸鎮兵皆出其下。賊平。馳還。取

徑塞外。戎騎辟易不敢逼。遂有輕中外心。恣睢驕橫。黨馨每裁抑之。且欲覈拜冒瀆罪。而承恩以強妾民女爲妾。簞之二十。哮雲、文秀又以陞授事。怨馨會鎮戍。請冬衣布花月糧。久勿給。坐營江廷。輔請給前銀。以安衆心。馨曰：「此有挾而求。漸不可長。彼不畏族乎？」軍鋒劉東陽拔撫署前鹿角作忿狀。拜喉之曰：「若等任爲之。遂羣哄不可制。」東陽者靖鹵衛人。素梟桀。有異志。於是糾黨晨入帥府白事。總兵張維素、鮮威望爲衆所輕。見衆驚懼不能彈壓。衆露刃。執副使石繼芳。擁入軍門。黨馨急匿水洞。索得。劫至書院。同繼芳僂之時。二月十八日事也。遂縱火焚公署。收符印釋囚。掠城中。劫張維忠。以侵糧激變。報時。河東軍事隨府通政穆來輔適抵鎮。賊并劫之。請招安以緩師。二十日。總督尚書魏學曾行部花馬池。聞變。遣標下張雲、郜龍諭降。二十三日。哮雲、王文秀統兵五百自中衛互市歸。合叛卒殺游擊梁琦。守備馬承光。二十五日。索赦印。維忠與之自縊死。東陽遂自稱總兵。聽拜主謀。據城刑牲而盟。授承恩許朝左右副總兵。王文秀、哮雲左右參將。挾慶王代請贖罪。承恩乃勅兵分遣王虎、何安等據城堡。會張雲等至。東陽曰：「必欲我降。依我所自署授官。世守甯夏。不者與套騎馳潼關也。」承恩徇玉泉營。游擊傅垣拒守。千戶陳繼武執垣降。徇中衛。徇廣武。參將熊國臣棄城匿。河西望風靡。惟王文秀徇平鹵。參將蕭如薰堅守不下。如薰妻楊氏。總督尚書兆之女也。謂如薰曰：「若爲忠臣。妾何難爲忠臣婦。」盡出簪珥勞軍士妻。帥之守城。賊攻圍數月。竟不能克。賊又率兵過河。欲取靈州。齎金帛誘套部著力兔等。許以花馬池一帶聽其駐牧。勢大猖獗。全陝震動。三月四日。副總兵李昫奉總督魏學曾檄。攝總兵進勦。統游擊吳顯趨靈州。別遣游擊趙武趨鳴沙州。張奇兵沿河扼城南渡。轉戰獲賊于正等八人。舟十八艘。賊鋒少挫。總督駐下馬關徵調時。

靈州裨將吳世顯黨逆。約是月九日與賊應。參將來保誓死守。賊齎書詐門拒卻之。洵聞急與吳顯兼程馳赴。逆謀始折。翼日調延綏。蘭靖兵稍集。洵乃分遣渡河收復營堡。廣武僞游擊張天紀。大壩僞守備高天爵俱遁。十五日復棗園堡。靖鹵參將吳繼祖擣中衛擒賊黨王虎。石空寺堡亦下。獲僞守備何安。二十日套部千騎薄邵剛堡。千總汪汝漢發三矢殺三人。乃解去。進復玉泉營。凡先後收還營堡四十七。河西唯鎮城爲賊據。後三日總督移師小鹽池。拜聞套部且至。屬王文秀許朝分馳迎之。二十五日著力兔。打正等引控弦三千騎馳金貴堡。二十七日移鎮河堡。入屯演武場。賊益掠城中子女媚之。奉河東西地圖。套人聲言已與噶王子爲一家。拜文秀並易服合兵攻玉泉急。二十九日噶雲引著力兔攻平鹵堡。參將蕭如薰伏兵南關。佯敗誘之入。伏射雲死。併傷驍賊吳敖霸。套部遁出塞。因掠糧道。聲犯花馬池諸處。趙武駐玉泉。被困急。李昫馳赴之。圍亦解。昫會原任總兵牛秉忠督六路兵。翼日低鎮城下。時總兵已擢董一奎。李賈副之。官兵抵城下。賊東北二門各出精騎二千搏戰。步卒列火車爲營。四月五日我師衝鋒奪火車百餘輛。追奔入河。溺死賊無算。延綏副總兵王通戰尤力。其家丁高益等三人乘勝先登。殺入北門。招榆林諸帥兵爲後繼。不至。被殺通亦傷額。榆林游擊俞尙德戰死。翼日許朝王文秀脅慶王至東城上樓乞暫罷兵。願縛首惡獻劉川。白金等謾語支吾。願投語救城下。示無所畏。拜妻施氏時諫不聽。又翟珮而立。謂拜曰。此何來。悖德不祥。奈何自取奇禍。承恩推跌去之。登南城遙謂都司李鯤曰。吾父出萬死爲國捍邊。蒙恩至上將。撫臣腹削激變。自取滅亡。吾父子勸部曲待命。當事不察。反以爲罪。今首惡具在。乃不罪倡亂罪戾亂者。吾甯保此完城。結塞北自全耳。會官軍糗糧乏。遂假此休士近堡。總督日夜促芻餉。

調延綏莊浪兵。乃以二十一日進攻。復抵城下。濠塹豎雲梯夾攻。賊迎敵多殺傷。承恩與東陽勸精騎潛伏。從延渠掠我糧餉二百餘車。先是衆議以李賁非衝邊才。乃調麻貴自戍所代之。貴素以勇聞。且多倉頭軍。至是軍亦至。二十九日夜。貴等乘風縱火。復以雲梯攻城。賊豫治滾木礮石待擲。火然燒我兵千數。賊日恣淫虐。城中婦女寶貨已經搜括。尙根索不已。死者甚衆。至迫脅慶府甚急。妃方氏懼辱。拔劍將自刎。保母抱持。并世子匿土窖中。以被服置井上環哭。賊見信爲溺。盡取金帛及他宮人去。比發。妃已死矣。總督凡用兵兩月無成功。憂之。或謂招劉許陰授意殺。呼拜父子立功贖罪。無不應者。督府然其謀。遣家丁葉待新往見時。四人方約共死。生不可開。暴其謀。執得新折脛下獄。命李如松總甯夏兵。浙江道御史梅國楨監其軍。時言者謂李氏握重兵。不宜拒虎進狼。而國楨力保如松忠勇可任。故有是命。巡撫甯夏已推朱正色。甘肅都御史葉夢熊上書願討賊。詔協力赴之。五月巡撫朱正色渡河督戰。以上命頒將士賞。一軍踴躍。賊聞詭請降。以張傑嘗總甯夏兵。與拜交善。遣入城招安。傑單騎往。切責之。許朝乃述葉得新片間謀殺語。傑未信。即早至。使吐實。得新大罵曰。死狗賊。計不得行。命也。天且夕礮汝。喋喋爲朝怒。損刀殺之。傑亦被繫。時頓兵數月。未能卽下。乃重懸賞格。購呼拜等。上特賜總督魏學曾劍。違者立斬。六月都御史葉夢熊至靈州。從甘肅搆神礮火器四百車至。更約法益徵苗兵。會浙江巡撫常居敬募浙江千人。糗糧自辦。詔嘉其忠。調赴甯夏。於是分爲五軍。董一奎攻其南。牛秉忠攻其東。李昫攻其西。劉承嗣攻其北。而麻貴率遊兵策應。二十日並逼城下。呼拜自北門出戰。意欲自往勾套部。麻貴率參將馬孔英先登赴敵。遂拜入城。擄斬百十七。先是拜與套部深相結。日夜從著力兔帳中。使調度。至是入

城不得出。套部不得拜。亦不敢復渡河深入。二十二日。御史梅國楨。提督李如松。統遼東。宣大。山西兵。厲集軍聲。大振。賊嬰城自守。國楨樹受降旗於城南。賊因索面陳歸順。許之。東陽。許朝等梯城而下。劍戟鱗次。刃芒矚目。城上皆控弦注矢。以待國楨策騎直前。朝大驚。不覺膝之屈也。然賊實給我無降意。自此盡力攻城矣。二十五日。我師用布袋三萬。盛土填集。登城爲礮石擊卻。都司李如樟夜半以雲梯上。南城翼日。游擊龔子敬提苗兵攻南關。如松乘勢欲擁入城。皆爲礮箭擊卻。我兵會食。賊卽縋下奪梯牌。益縱火焚攻具。是夜。指揮趙承光。葛臣。戚欽。武生張遐齡。百戶姚欽。約爲內開。夜半。四面並舉烽火。城下兵趨上。而樵樓火蚤發。南火弗起。城中果鼓譟大呼殺賊。欽倚遐齡縋城召外兵。行未中道。欽復亟跳城下呼救。而賊蚤覺。已盡縛趙承光。戚欽等殲之。許朝因欲開小南門逸。以外兵整不敢出。自是城中糧且盡。銳氣益喪矣。七月。給事中許子偉劾總督尙書魏學曾。惑於招撫。罷秩。命葉夢熊代之。賜劍如故。七月二日。許朝等至南關。請總兵董一奎款語。僉事隨府乘閒同家人抱關防從城躍下。傷肱不能起。賊復縋執繫獄。翌日。定議水攻。甯夏城西北卑下。且與金波三塔諸湖之水相近。東南逼觀音湖新渠。紅花渠。形如釜底。遂遠城築堤。十七日。堤成長千七百丈。決水以灌。先旱。呼拜遣養子克力蓋往著力兔求援。松調知狀。命裨將李甯。與斬之。并其從騎二十九級。獲符令箭。居有頃。套部莊禿賴與卜失兔。各部落三萬。先使土昧。糾糾雷等犯定邊小鹽池。而打正以萬騎從。花馬池西沙湃入。總督檄麻貴偵擊。以牽打正。別遣董一元乘虛出塞。擣其穴。麻貴進戰石溝旁。敵稍卻。分趨下馬關及鳴沙州。總督遣游擊龔子敬提苗兵八百堵沙湃口。東趨定邊。與董一元合。亡何。一元報擣土昧巢。斬獲三千餘級。套部驚引去。而打正還至沙湃。



苗兵直前掘之。衆寡不敵。被圍十餘匝。子敬力戰死。然套部竟以擣巢解散。賊援絕。我師益決大壩水。八月朔。城外水深八九尺。是夜。賊小舟挖堤洩水。官兵擒斬十六級。生得一人。爲言城中乏穀。士盡食馬。馬餘五百匹。民食樹皮。死亡相屬。翼日。城東西崩百餘丈。都司吳世顯。參將來保所一堤亦各崩二十丈。水頓減。總督斬吳世顯以徇。來保用靈州功免。仍悉力補堤。賊數出兵來擾。多被斬獲。城中飢民擁賊求招。安十二日。御史梅國楨檄賊以飢民故。爲治錢穀。檄到三日。開關迎大兵入賑。賊不報。時套部數圍入堡來救。二十一日。著力兔以八百騎入鎮比堡。又擁衆萬餘入李剛堡。分部渡河。總兵李如松遣裨將李甯等馳赴黃破口擊之。以勁卒千餘身往策應。行至張亮堡。遇敵搏戰。自卯至巳。敵銳甚。如松劍斬縮胸二人。會麻貴。李如樟等亦至。張左右翼夾擊。李甯手瘡。二人敵遂卻。進奔至賀蘭山。盡走出塞。我師捕斬百二十餘級。獲駝馬無算。乃移級示賊。賊爲之奪氣。九月三日。參將楊文提浙兵至。已苗兵莊浪兵俱至。大治臨衝船筏。刻日攻城。總督葉夢熊布告軍中。有能先登以城下者。予萬金。後五日。水浸北關。城崩南關。蔣永壽等約內應。我師陽調舟筏擊北關。承恩許朝果趨北關應戰。李如松肅如薰潛以銳卒掩南關。總兵牛秉忠年七十。賈勇先登。梅國楨呼諸將曰。老將軍登城矣。餘何怯也。遂畢登。夢熊入城。勞苦百姓。承恩等見南關下。則盡氣奪。乃急隄張傑下城。懇貸死。夢熊陽許諾。益治攻具。先遣王機密以蠟書行間。時承恩雖求撫。墜門斷塹。守益固。有賣油李登者。跛而眇。負罌木歌於市。曰。癰之不決。而狃於瘡。危巢不覆。而令梟止。監軍梅國楨問之曰。是可使也。召登。授三劄。縛木渡東門。見承恩曰。監軍以呼氏有安塞功。今與鼠輩駢首并誅。深用惜之。軍中非乏所使。以登殘民不駭視。有密記授將軍。將軍幸有意聽登。則殺

劉許自贖。卽不聽。願死麾下。毋留登。承恩猶豫。許之。登趨而出。間道詣東陽朝。亦各致劄。曰。將軍故漢臣。而首亂。在啁氏。何橫身與人。嬰禍。鎮卒幾何。能當都督軍。此無異驅乳雀而鬪羣鶴。所恃不過套援。將軍不記演武臺上。彼親土。啁目中。豈有將軍哉。所爲貴智者。以能度時審勢。轉禍爲福也。東陽朝亦心動。自是互相猜疑。十六日。圍愈迫。東陽頓足歎曰。遂至此耶。佯爲風疾。殺王文秀曰。好頭頸。毋令他人砍之。先是鎮民郭坤有姜美。坤死。賊黨周國柱以繭帨一雙。聘焉。許朝亦往議。姜曰。受周家聘矣。朝以問柱曰。誠有之。朝怒其不相讓。銜之。會承恩聞李登之說。方惶惑。召所親石棟問計。棟曰。周國柱見事審而決。雖東陽臣。然與朝有隙。盍呼之。國柱至。承恩與謀。欲召東陽朝飲。醉誅之。國柱曰。兩家前後皆戈鉞之士。以一制二。恐非萬全。將軍當計誅朝城南。柱乘間取東陽也。承恩然之。遲明。承恩過。呼朝時朝正坐考訊。承恩急呼曰。將軍何暇問此。有密事。登樓議之。廳衆下曰。將軍知周國柱有異心乎。吾將與將軍斷其首。語未竟。承恩家卒世富大宣遽曰。外營礮向樓。無宜久駐。此承恩疾下。朝跋後從。大宣掖之。梯半。世富抽佩劍。砍之。首隕梯下。因縛其從騎盡斬之。國柱見塵遽起。有兵劍聲。知事濟。乃披鎧登樓。佯謂東陽曰。官軍已入南城矣。東陽驚起。憑軒望。國柱自後斬之。不死。走入廁房。支戶。國柱引足破戶。梟其首。出衆譁曰。國柱奈何。殺將軍。柱叱曰。若不避死走。官軍盡斬汝。誅一逆賊。何譁也。衆盡散。承恩既殺東陽朝及文秀。懸首城上。於是李如松。楊文先。登。蕭如薰。麻貴。劉承嗣。繼之。大城悉定。北樓火起。李如樟馳往。搜獲甯夏巡撫關防。并征西將軍印各一。時啁氏尙擁蒼頭軍。總督葉夢熊在靈州聞之。亟令詰旦。不滅。啁氏者服。尙方十七日晨。承恩方馳南門。謁監軍梅國楨。出參將楊文執之。李如松急提兵圍啁拜家。拜方與牛秉忠餼。

聞承恩嚮，乘忠趨出，衆欲拒敵。如松給箭令卸甲，拜倉皇縊。闔室自焚。李如樟部卒何世恩從火中斬拜首，生待拜中子承寵。養子哮洪大、王文德、何應時、陳雷、白鸞、陳繼武等。總督葉夢熊、巡撫朱正色、御史梅國禎隨入城。問慰宗室士庶。甯夏半捷奏，上御門受賀。已復輿致承恩獻俘。十一月，詔磔哮承恩、哮承寵、哮洪大、王文德等俱。駢斬長安市。頒示天下。及四裔。君長下詔慰慶。王復甯夏出租。王妃方氏不屈死。特賜褒異。大賞甯夏功臣。葉夢熊、朱正色、梅國禎各陞世官。武臣李如松功第一。加宮保。蕭如薰次之。麻貴、劉承嗣、李如樟、楊文、牛秉忠等加恩有差。如薰妻楊氏守平鹵有功。制敕旌賞。贈死事。襲子敬都督僉事。給事中曹大成劾穆來輔、隨府依遠、緹騎逮治。遣戍魏。學曾以原官致仕。

谷應泰曰：哮拜以嘉靖中亡抵朔方，屢立戰功。萬歷中，備位副將。其子承恩襲爵，乃拜雖請老，而多蓄蒼頭軍，聲言報國。蓋不無異志焉。方其矍鑠請纓，挾其子從三千人而西也。毋亦觀諸鎮之虛實，結套部爲腹心，潛伏陰謀，待時而動。豈真有廉頗之壯志、文淵之據鞍哉。乃以不給壯馬、侵剋月糧爲黨，謾罪此特。哮氏之權譎，借爲兵端者耳。以故劉東陽之變，則拜嗾之；哮雲、文秀之怨，則拜陰中之搆。拜之意，不過恃套爲長城，緩則倚之爲外援，急則引之爲內助。天是以立於有勝而無敗，敢於倡亂而輕於爲叛逆也。若然，則善勦者不當勦拜，而當勦套。不在挫套，拜之鋒銳而在隔套，拜之聲援套絕，則拜者孤雛腐鼠，取之如寄者耳。想其初拜，套聲言聯爲一家，即可驗其情狀。而東陽之恐喝，則曰：與套馳潼關，著力兔之入寇。則曰：畀以花馬池，克力蓋之求援，則能遠致莊克賴。如是，即拜之恃套相倚爲命者也。善乎葉夢熊爲帥，而五路分兵，扼守甯夏，拜不得出城。套不敢渡河，而哮氏之計窮蹙極矣。迨至打正驚奔，賀蘭遠遁，拜雖

遊魂可坐而縛也。尤有幸者。文秀見殺於東陽。東陽蒙誅於國柱。許朝那命於承恩。始則虎狼之殘。物以類聚。繼而昆蟲之噬。遠相爲攻。倘所謂天道是耶。非耶。比神宗受質。承恩俘馘。雖師武諸臣。協謀有力。而葉夢熊聲請討賊。自辦糗糧。梅國楨仗劍從軍。力保李氏。肅如薰之妻。楊氏誓珥犒軍。羣婦壘守。則尤犖犖者也。

## 卷六十四

### 平楊應龍

神宗萬曆十七年。四川播州宣慰司使楊應龍反。按播州夜郎且蘭地。漢屬牂牁郡。唐貞觀初。分牂牁北界置郎州。領六縣。已改播州。乾符三年。南詔寇陷太原。楊端應募決策。馳白錦。出奇兵定之。授武略將軍。值唐亂。留據長子孫。歷宋附屬。稱臣。大觀中。楊文貴納土。置遵義軍。元世祖授楊邦憲宣慰使。賜子漢英名。眷因不花。封播國公。國初。楊鑑內附。改播州宣慰司使。隸四川。其域廣袤千里。介川湖貴竹間。西北暨山爲關。東南附江爲池。蒙茸鏃削。居然奧區。領黃平草塘二安撫。眞播白泥餘慶眞安容山六長官司。統田張袁盧譚羅吳七姓。世爲目把。嘉靖初。楊相龍庶子煦。欲奪嫡。嫡妻張與子烈擁兵逐相。走水西。客死水西。宣慰安萬銓挾奏。索水煙天旺地聽還葬。烈卽應龍父也。自烈仇殺。長官相攻。剽垂十年。總督侍郎馮岳討平之。應龍生而雄猜。尤阻兵嗜殺。隆慶六年。襲職。以從征喇麻諸番九絲賦乃楊柳溝等。多卻敵先登。斬獲無算。先後賜金幣萬歷十二年。進大木六十本。助工。上特給大紅飛魚服。加職級。應龍窺蜀兵

弱。每征討。止調土司。而蜀將或從借給。漸驕蹇。輕縱法。所居僭飾龍鳳。擅用闍寺。嬖小妻田雌鳳。疑嫡妻張姦淫出之。已飲田氏兄所乘醉。封刃取張并其母首。屠其家。應龍在州。專酷殺樹威。益結關外生苗爲翼。肆行劫掠。於是妻叔張時照與所部何恩。宋世臣等上飛文告龍反。巡撫貴州葉夢熊疏請發兵勦之。而蜀中士大夫率謂蜀三面鄰播。屬裔以千百數。皆其彈壓。且兵驍勇。數赴征調。有功。翦除未爲長策。以故蜀撫按並主撫。朝議行西省會勘。應龍願赴蜀不赴黔。

二十年十二月。逮楊應龍詣重慶。封簿繫論法當斬。請以二萬金贖。御史張鶴鳴方駁問。會倭大入朝鮮。羽檄徵天下兵。應龍因懇辨。願自將五千兵征倭報效。詔可。釋之。兵已啓行。尋報罷。巡撫都御史王繼光至。嚴提勸結。遂抗不復出。而張時照等復詣奏闕下。王繼光乃一意主勦。

二十一年春正月。撫臣王繼光馳至重慶。與總兵劉承嗣。參將郭成等議分三軍。各道並進。時軍至婁山等關。屯白石口。應龍伴令其黨穆炤等約降。因統苗兵據關衝殺。都司王之翰軍覆。殺傷大半。會繼光論罷。卽撤兵。委棄輜車路盡。黔師協勦亦無功。以譚希思爲四川巡撫。與總兵劉承嗣會同貴州撫鎮相機征勦。時王繼光旣罷。御小薛繼茂乃旋主撫。應龍亦上書自白。御史吳禮嘉劾郭成等失律。令戴罪立功。尋劉承嗣以疾乞骸骨。兩省議久不決。應龍遣其黨攜金入京行間。執原奏何恩詣荃江縣。

二十二年三月。以兵部侍郎邢玠總督貴州。車駕郎中張國璽主事。劉一相贊畫軍前。

二十三年春正月。總督邢玠乘傳至蜀。察永甯西陽暨馬千斛皆應龍姻媾。而黃平白泥諸司久爲仇讐。計先翦其枝黨。以傲峴營應龍。大略稱引。哮劉事。謂龍來當待以不死。不者。國家懸萬金購而頭。若蚤爲

計吾不而敗也。會水西宣慰安疆臣請父國享卹典。兵部尚書石星手札示疆臣。趣應龍就吏。得黃罪。疆臣亦奉札至。番招龍。當是時。七姓惟恐龍出得除罪。而四方亡命竄匿其閒。又幸龍反。因以爲利。院道文移輒從中阻。四月。重慶太守王士琦奉總督邢玠檄。詣綦江縣。趣應龍安穩聽勸。士琦屬綦江令前往宣諭。應龍使弟兆龍至安穩。治郵傳儲糧。郊迎叩頭。致饋餼。牽如禮。曰。應龍久縛渠魁。待罪松坎。所不敢至安穩者。以安穩多仇民。伏兵伺殺。往有明鑑。誠恐中計。故不敢出使。君幸枉車騎。臨貺松坎。敬布腹心。綦江令具言太守。太守曰。松坎亦曩奏勸地也。卽以五月八日。單騎往松坎。應龍果面縛道旁。泣請死罪。膝行前席。叩頭流血。請治公館。執罪人及罰金獻廷中。得自比安國。亨國亨者。曩亦被訐。懼罪不出界。故應龍引之。太守爲請總督。乃遣贊畫張國璽。劉一相及道府詣安穩。應龍囚服蒲伏郊迎。縛獻黃元。阿羔。阿苗等十二人案驗。抵應龍斬。以其族得論贖。輸四萬金。助採木。仍革職。子朝棟以土舍受事。次子可棟。鞫府追贖。黃元等梟斬重慶市。總督以聞。是時倭氛未靖。大司馬欲緩應龍專事東方。天子亦以應龍向有積勞。可其奏。總督設撫彝同知治松坎。從之。論功加邢玠右都御史。還朝。以重慶太守王士琦爲川東兵備使。彈治之。應龍再及寬政。益怙終不悛。而次子可棟尋死重慶。則心益痛。促取屍棺。以勘報未完。不肯發。趣其完贖。大言曰。吾子活銀卽至矣。擁兵驅千餘僧招魂而去。分遣土目置關據險。僭立巡警。搜戮軍民。劫掠屯堡。殆無虛日。厚撫諸苗。用以摧鋒。名硬手。州人稍殷厚者。沒其家以養苗。由是諸苗人願爲之出死力矣。

二十四年七月。楊應龍肆逆。劈餘慶土吏毛承雲棺。磔其屍。已。又掠大阡都壩。焚劫餘慶。草堂二司。徧及

興隆、偏鎮、都勻各衛遣弟兆龍引兵圍黃平。戮重安司長官張熹家，勢復大熾。

二十五年三月，楊應龍流劫江津縣及南川。十二月，楊應龍臨合江，索其仇袁子升絕城下，樹割之。

石砫宣撫司土舍馬千駟入播，先是千駟母覃與應龍私，覃寵千駟，謀奪長子千乘爵，於是聘應龍次女爲聲援。

二十六年十一月，兵備副使王士琦調征倭，楊應龍益統苗兵大掠貴州洪頭、高坪、新村諸屯，已又侵湖廣四十八屯，阻蹙鐸站，詞原奏仇民宋世臣父變及羅承恩等挈家匿偏橋衛城，襲執指揮陳天龍等大安城中，得變承恩及子女，慘戮以徇，令諸苗對父奸女，面夫淫妻，或裸體坐木叢射笑樂，或燒蛇從陰入腹，人蛇俱斃，又掘墳墓焚屍，灰飛蔽天，巡撫四川都御史譚希思請於合江、綦江各置游擊一員，合江募兵千二百人，掘岡門，綦江募兵二千人，掘安穩。

二十七年二月，貴州巡撫江東之令都司楊國柱，指揮李廷棟部兵三千勦楊應龍，龍遣子朝棟、弟兆龍、何漢良等迎敵於飛練堡，我師奪三百落，賊佯走天邦園，誘我師殲之，楊國柱罵賊不屈，與經歷潘汝資等俱死，於是江東之坐浪戰罷，以郭子章代之，起前都御史李化龍兼兵部侍郎，節制川湖貴三省兵事，決意進勦，謂東征諸將南征，劉綎督川兵先發，麻貴、陝、璘、董一元相繼回兵。五月，總督馳至蜀，卽請設標兵，益調募浙閩滇粵將十，檄總兵萬鏊自松潘移重慶，并調集鎮雄、永甯各漢土兵設防。六月，楊應龍乘我師未集，大勦兵犯綦江，分屯趕水、貓兒岡、婁國等，以偏師一犯南川，一犯江津，其子朝棟守沙溪，緝麻、防永甯官撫與貴州十七日，游擊張良賢遇賊舊東溪，頗有斬獲，二十一日，應龍督苗兵圍綦江。

城數匝。游擊房嘉龍誤熱火輒反。傷城上兵。賊乘勢登城。嘉龍帥師巷戰。蜀兵爭譟走水上。嘉龍乃殺其妻。與良賢赴敵死。應龍因劫令縱囚焚掠。出綦江庫犒師。依倉就食。盡取資財子女去。老弱者殺之。投屍蔽江而下。水爲赤。退屯三溪。以綦江之三溪毋渡。南川之東鄉壩立石爲播界。號宣慰官莊。聲言江津。合江皆播故土。總督郭子章日夜徵調漢土各兵守渝城。分戍南川。合江。瀘州。軍聲漸振。賊遷延不進。初。賊本無意竟反。徒以安忍猖狂。既覆我師。飛練則騎虎勢不終下。益結九股生苗及紅黑脚等苗。負險弄兵。然猶冀我如往事曲宥。未敢鼓行深入。止言爭界給葬。并索奸民。而總督因我援師未集。蜀人畏賊如虎。時時移文詰責。示無遷絕意。計以緩賊。賊果具文求撫。不復西向。總督亦謬爲好語。廢之。止駐會城調度。示賊無張皇。已上聞破綦江。追褫兩省撫臣譚希思。江東之各爲民緹騎。逮兵備使王貽德。賜劍懸賞。嚴旨進勦。總督益調各路兵專俟大舉。十月。命總督李化龍駐重慶。調度川。貴湖廣兵。總兵劉綎兵亦至。綎素有威名。其家丁良馬皆可決勝。然夙與應龍昵。人皆疑之。於是總督延入臥內。輸心腹。且以危言激之。引其父顯九絲功爲比。綎大慟。願誓死報效。總督乃騰書於朝。遂委綎專制。而總督治軍益有次第。十一月。楊應龍屯官壩。聲窺蜀。已遂焚東坡爛橋。楚黔路梗。黃平。龍泉所在告急。賊復據偏橋出掠興隆。鎮遠。總督議置勁兵萬餘據要害。通楚黔道。黔帥童元鎮擁兵銅仁不前。革職立功。以李應祥代。命僉都御史江鐸巡撫偏沅監總兵陳璘之師。

二十八年春正月。楊應龍勒兵數萬。五道並出。攻龍泉司。守備楊惟忠擁兵二千。以勢不敵。先期託臺謁走思南。鸚鵡溪。土官安民志率步卒五百拒守。死之。吏目劉玉鑾偕妻子並死於賊。副總兵陳良玘託守



偏橋不之援。石柱宣撫司馬千乘軍郿坎。賊乘夜掩襲。我軍堅壁。詰旦奮擊。連破金竹、青岡、虎跳關等七寨。酉陽宣撫司冉御龍進攻官壩。斬關直上。復擒斬三百有奇。初賊既下龍泉。方移兵攻婺州。聞敗。撤兵遁。徵兵大集。延甯四鎮、河南、山東、天津、滇、粵西兵至者踵背相屬。各土司亦用命。總督李化龍分兵八路。川師分四路。總兵劉綎從綦江入。以參將麻鎮等隸。參政張文耀監之。總兵馬孔英從南川入。以參將周國柱、宣撫冉御龍等隸。僉事徐仲佳監之。總兵吳廣從合江入。以游擊徐世威等隸。參議劉一相監之。副將曹希彬受吳廣節制。從永寧入。以參將吳文傑、宣撫奢世續等隸。參議史旌賢監之。而中軍率標下遊兵策應。黔師分三路。總兵童元鎮統土知府瀧澄、知州岑紹勳等由烏江。參將朱鶴齡受元鎮節制。統宣慰安驥臣等由沙溪。總兵李應祥統宣慰彭元瑞等由興隆。參議張存意、按察司楊寅秋監之。湖廣偏橋一路分兩翼。總兵陳璘統宣慰彭養正等由白泥。副總兵陳良玘受璘節制。統宣撫單宜等由龍泉。副使胡桂芳、參議魏養蒙監之。以偏橋江外爲四牌。江內爲七牌。五司遺種及九股惡苗濫據故也。其黔撫郭子章駐貴陽。楚撫支可大移沅州。部署既定。大會文武於重慶。登壇誓師。二月十二日分道並發。每路兵約三萬人。官兵三之。土司七之。苗見驚曰。今番真天兵。與昔不同。總督諭諸將以抵婁山等關爲期。移鎮重慶節制。且曰。關外且戰且招降。多不可勝誅也。關內疾戰勿受降。師不可久老。賊詐不可信也。先是蜀玉壘山忽裂。僉謂昔年平九絲地數動。殆播平前兆云。十五日。劉綎進兵綦江。連戰破三峒。綦江自東溪入播。並峻嶺茂箐。柵木、山羊、簡臺三峒素號奇險。賊首穆炤等盤據。縱力戰克之。三月。楊朝棟統苗兵數萬分道迎敵。鋒甚銳。我師夾擊。綎身自陷陣。苗大驚曰。劉大刀至矣。棟潰圍走。幾爲我獲。初。綦江

諸苗自分屠城慘戮罪不赦。又應龍懼縊威名。冀首挫其鋒。屬朝棟悉勁兵。間道相角。曰。爾破茶江。馳南川。盡焚積聚。餘無能爲也。及朝棟僅以身免。賊膽落。益爲守禦計。諸軍分道並捷。南川則西陽石柱二司先登。初八日。遂克桑木關。烏江則壩陽永順兵先登。十一日。遂克烏江關。翼日。克河渡關。陳璘及副將陳寅擊四牌。賊各披靡。遂奪天都三百落。諸國賊連敗。乃乘隙出奇兵突犯烏江。詐稱水西。瀧澄會哨誘永順兵。斷橋淹死我師無算。參將楊顯守備陳雲龍。阮上奇。白明遠。指揮楊續芝等死之。事聞。逮總兵童元鎮下於理。時有飛語水西佐賊者。總督檄詰。水西不自安。會賊殺其頭目澄大眼。二十六日。賊託田氏修好賄澄。澄戮其使。擊斬僞將楊惟棟等。安疆臣亦執賊二十餘人。以示不肯。二十九日。劉綎戰九盤。入婁山關。關爲賊前門。萬峯插天。中通一線。我師從間道攀藤魚貫毀柵入。四月朔。屯白石。應龍身率各苗決死戰。陰令楊珠等抄後山奪關。四面合圍。都司王芬中流矢死。劉綎親勒騎衝堅。以游擊周敦吉守備周以德分兩翼夾擊。敗之。追奔至養馬城。與南川永甯路合。連破龍爪海雲險。圍壓海龍國而壘。海龍國賊所倚天險。飛鳥騰援不能踰者。時偏沅巡撫都御史江鐸已抵任。視師。陳將軍璘帥師急攻。以十三日破青蛇圍。安疆臣亦以十六日奪落濛關。至大水田。焚桃溪莊。賊見勢急。父子相抱哭。上國圍守。每路投降文。緩我師。總督檄賊詭降。卽斬。使焚書。毋爲所給。虞縊與應龍舊。檄無通賊。縊械其人自明。而吳廣以朔三日入屋門關。營水牛塘。與賊力戰三日。卻之。賊詭令婦人於國上拜表痛哭。云田氏且降。復詐爲應龍仰藥死報廣。廣輕信。按兵不動。已。覘知田氏詐降。緩攻。而所云應龍死。乃川兵攻國。以火礮擊死所謂楊珠也。珠驍勇善戰。旣死。賊痛如失左右手。廣覺詐。益厲兵協攻。燒二關。奪三山。絕賊樵汲。八路兵大集。

海龍圍下五月十八日始築長圍更番迭攻自是賊坐困窮厓知兵在頸矣會總督李化龍聞父喪詔以縋墨視師化龍跌而草檄益治軍念賊圍前陡絕勢難飛越令馬孔英率勁兵壁其間餘併力攻柵圍時天苦雨將十馳淖中苦戰六月四日天忽開朗五日劉縉身先士卒進克土城應龍益迫夜散數千金募死士拒戰諸苗皆駭散無應者起提刀自巡壘見四圍火光燭天徬徨長歎泣語妻子曰吾不能復顧若矣詰朝我師遂卷圍破大城入應龍倉皇同愛妾二闔室縊且自焚吳廣獲其子朝棟及妾田雌鳳急覓屍出焰中廣中火毒失聲幾絕頃而甦計出師至滅賊百十有四日八路共斬級二萬餘生獲朝棟兆龍等百餘人播賊平總督露布以聞劉將軍縉爲軍功冠十二月獻俘闕下劉楊應龍尸磔楊朝棟兆龍等於市分播地爲二屬蜀者曰遵義屬黔者曰平越

谷應泰曰楊應龍播州土司官也其地屬漢牂牁郡唐乾符中楊端應募長子孫焉歷宋元皆授世官明室囚之應龍生而雄猜尤阻兵嗜殺然其賓叛不一荒忽無常亦土司之風類然也應龍之初從征喇嘛淮貢大木亦嘗效忠順膺賞賚矣乃以嬖小妻田雌鳳堵妻張氏之家而何恩宋世臣連章告變黃牛白泥諸司久爲仇讐於是七姓諸豪咸喜龍之得罪不欲其就徵對簿而五司遺種九股頑苗及輕剽好作亂之徒又鼓動其間同惡相濟龍雖狼子野心亦所謂生長蠻鄉無與爲善者也所幸援兵大集調度多方督臣李化龍發蹤之才總戎劉縉軍功之冠於時八路分兵四月告捷卒之應龍戮尸朝棟棄市威震遐荒功業爛焉然而重慶之會登壇誓師海龍之圍剋期並到兵法曰兵貴有謀又曰以多算勝固先定其規模非漫嘗於一盤也若應龍者偏強偏陲不知漢大宗嗣蕩滅取世戮笑尤足爲憑險負固之戒悲

夫。

卷六十五

礦稅之弊

神宗萬曆二年二月。太監張誠等求領真定木稅。工部執論不許。

七年七月。給事中顧九思。王道成。請撤浙直織造內臣。上以示大學士張居正。居正曰。地方多一事。則有一事之擾。寬一分。則受一分之惠。災地疲民。不堪催督。撤之使上從之。十一月。命浙直織造添織七萬三千。張居正言添織之費不下四五十萬金。在庫藏則竭。在小民則疲。浙直水災蒙恩。獨濟方撤織監。又復加派。非聖意所以愛養元元也。上命減其半。

八年九月。太監王效稱缺歲額銀硃等料。戶部尚書張學顏奏登極一詔盡損不急之務。宜諒停罷。上從之。

十年四月。順天府尹張國彥請豁房稅。不報。

十一年正月。戶部請停買金珠。不報。

十二年六月。四川巡撫雒遵奏採木之害。八月。房山人史錦請開礦。命下撫按。

十四年四月。南京工部尚書蔭武卿乞減免織造。燒造瓷器。停解花梨杉枹。不聽。九月。戶部侍郎張國彥言蘇杭之織造。江西之瓷器。公主之廣求現寶。得無與漢文百金之費相類乎。不聽。

十六年十一月遣內臣禱祠五臺山。還奏言紫荊關外昌靈邑可定礦砂作銀冶。奸民張守清擅其利。一日上視朝畢召大學士申時行等於皇極殿語及之。時行等請敕部行撫按查問禁戢。上是之。命逮守清。伏法。閉塞礦洞。

十八年九月易州民周言請開礦玉田。豐潤民復以請。部未報。上遣文書官至關速之。輔臣因言開礦之害。御史邵以仁亦力言其不可。

二十四年六月府軍前衛副千戶仲春請開礦助大工。從之。命戶部錦衣衛各一同仲春開採。給事中程紹工。楊應文言嘉靖二十五年七月命採礦。自十月至三十六年。委官四十餘。防兵千一百八十八。約費三萬餘金。得礦銀二萬八千五百。得不償失。不聽。七月錦衣衛百戶陸松。鴻臚寺隨堂官許龍。順天府教授馮時行。經歷趙鳳等各言開礦助大工。從之。戶部尚書楊俊。民言真。保。薊。易。永平開礦。恐妨天壽山龍脈。上謂距陵遠。且皇祖嘗開之。不聽。命戶部郎中戴紹科。錦衣僉書楊宗。吾開礦。汝南。八月詹事府錄事會長慶。錦衣衛百戶吳應麒。請山西夏邑開礦。府軍後衛指揮王中允。請青沂等開礦。從之。招礦盜開採。仍編富民爲礦頭。從太監王虎請也。錦衣衛百戶汪文通言沂州礦。指揮郝承爵言費縣礦。指揮劉鑑言棲霞。招遠等礦。指揮馬清言文登縣礦。千戶趙良將言沂水。蒙陰。臨朐礦。命太監陳增同府軍指揮曾守約開採。九月巡撫山西魏允貞請停開礦。不報。太監王虎論保定巡撫李盛春阻撓開採。下旨切責。十一月戶部郎中戴紹科進礦砂銀。自後進者踵至。十二月遣太監張忠往山西。曹金往兩浙。趙欽往陝西。各開礦。輔臣沈一貫言留守中衛王。一清請稅煤炭。爲民害。不報。先是奸人王君

錫奏開易州礦。旨下戶部議。尙書林材執奏。且上言山冶之害小則爭掠。大則嘯聚。盜之囹。寇之藪也。遂幡然從之。遂君錫。令勿潛住生奸計。至是新建張位秉政。以爲利出於天地之自然。可益國無病民。採之便。上遂從其言。

二十五年春正月。御史況上進。給事中楊應文言。建昌採木之害。人夫渡瀘。觸瘴死者被野。吏胥假公行私。毒流百姓。不報。戶科程紹言。開礦事變多端。疏凡五上。俱不報。二月。給督徵天津等處店租。內官關防。三月。浙江巡按王業宏言。礦稅不便者六。乞停罷。不報。四月。刑部侍郎呂坤言。洮蘭之絨。山西之紬。浙直之段。絹積於無用。若服有定期。歲用千匹。而江南山陝之人心收。採木之害。饑渴瘴疫死者亡論。乃一木初臥。千夫難移。遭險蹉跌。死嘗百人。倘減其尺寸。少其數目。而川貴湖廣之人心收。礦稅無利。勒民間納銀。民不能支。括庫銀代。豈開礦之初意哉。誠敕各省使臣。嚴禁散砂。不許借解。而各省之人心收。自趙承勛造四千之說。而皇店開。朝廷有內官之遣。而事權重。且馮保八店爲屋幾何。而歲四千金。不奪市民。將安取乎。誠撤各店之內官。而畿內之人心收。不報。九月。太監陳增劾福山知縣韋國賢阻撓開採。逮下獄。巡撫萬象春奪俸。山西巡撫魏允貞奏言。巨璫出領礦稅。爲民鑿齒窺竅。而礦爲尤甚。璫亦反噬。以激上怒。允貞又上書言。朝廷得失。譏切宰臣。不能輔導。致使刑餘之人。播惡上切責之。二十六年六月。命內監李敬採珠廣東。七月。神武衛千戶朱仁等奏。湖口船稅可萬餘金。鴻臚寺主簿田應璧言。兩淮沒官餘鹽。命內監李道督稅湖口。魯保經理淮鹽。俱許節制。有司戶科給事包見捷。上言開礦之害。陛下謂徒取諸山澤。在礦使實奪取之。閭閻搥擊入山者十二載。虎狼出柙者半天下。科臣趙

完璧、郝敬、道臣許聞造、姚思仁、交章言之不報。奪保定巡撫李盛春等俸。以天津店稅銀解進遲延故罰。八月，太常寺少卿傅好禮言：近郊假官抽稅不報，越三日，好禮伏文華門求面對，上怒，降廣昌典史。大理寺卿吳定疏救，削籍，而假官二十八人下鎮撫司。惜薪司柴炭歲兵工二部二十餘萬，至是求益。給事賈維春言：歲進物料，上用什之二三，餘盡入溪壑，今復求益不已，豈真爲國家計盈縮哉？不報。九月，益都知縣吳宗堯奏：礦務太監陳增罔上營私，益都有鉛砂無銀礦，增強之入銀業，非法矣。復強採者代納，稍緩逮及吏民，陛下所得十一，而增私彙十九。山東巡撫尹應元參增罪狀二十餘條，忤旨，奪俸。宗堯下鎮撫司削籍。十月，卜雲南大理採石。

二十七年春正月，分遣御馬監高竊、權京口、供用庫官暨祿權儀真。二月，百戶張宗仁請復浙江市舶。命太監劉成權稅浙江。千戶陳保請權珠。命內監李鳳採珠廣州，兼徵市舶司稅課，設福建市舶司。命御馬監高竊兼礦務。命內監楊榮開採雲南。陳奉徵荊州店稅，陳增徵山東店稅，孫隆帶徵蘇杭等處稅課，魯坤帶徵河南，孫朝帶徵山西。時奸弁馮綱等望風言利，皆朝奏夕遣。湖口稅監李道參、南康知府吳寶秀、星子知縣吳一元，僨侵國稅。命緹騎逮下理。寶秀至任纔十六日，初任大理廉平有聲，至是忤道被逮。妻陳氏自縊檻車旁。內監邱乘雲徵稅四川，兼礦務。梁永徵稅陝西，各以原奏千戶翟應素、樂綱等往。御馬監潘相督理江西瓷廠。前珠池太監李敬兼廣東礦稅，輔臣沈一貫言：中使衙門皆創設，竝無舊緒，可因大抵中使一員，其從可百人，分遣官不下十人，此十八人各須百人，則千人矣。此千人每家十口爲率，則萬人矣。萬人日給千金，歲須四十餘萬，及得纔數萬，徒歛怨耳。今分遣二十處，歲糜八百萬。

聖恩偶未之及也。乞盡撤之。不報。尋諸省皆併稅於礦使。三月。內監王忠徵稅密雲。張燁徵稅蘆溝橋。太監陳增馬堂爭稅。命堂稅臨河。增稅東昌。命錦衣衛千戶章夢麒同御馬監奉御陳奉徵收湖廣等處店稅。徵銀六萬有奇。上以湖廣荊州原有辛效忠店房。曾經遼藩竊據。後張居正私意革免。命撫按奏明。巡撫支可大奏湖楚內錯江湖。故稱澤國。物產非有縑纈紛繡之奇也。厥貢非有璆琳琅玕之珍也。比歲採木重役。焚林竭澤。十室九空。舊有各項稅課。如荊州遼府張居正店房已經沒入。變價解京。盡屬民間之業。今僅於沙市徵收稅銀。及各府原設有稅課司。有門攤商稅。有茶鹽油布雜稅。內以給解京濟邊之用。外以充宗藩吉凶之資。大之供官軍俸錢科舉兵餉之需。小之作紙割公費工食衣糧之數。紀載甚明。今若併前項收入內帑。則百用乏絕矣。若迫於用。詘復議加派。則下民怨咨矣。此猶以在官言之也。至其在民行貨有稅矣。而算及舟車。居貨有稅矣。而算及廬舍。米麥菽粟。饔餐也。而稅。鷄豚肉食也。而稅。耕牛羸驢。一畜產也。而稅。搜刮於十五郡之中。遍及於一百十六州縣之內。一歲之中。驛遞錢糧。動以千計。雖欲不擾地方。不可得矣。楚故獷悍。又以橫政驅之。有莫知其所底止者。不報。戶科給事包見捷疏論礦店滋蔓。又疏論臨清稅使擾民。必致生變。又疏遼左陟危。礦市爲患尤烈。一月三疏。指數內使切直。時論譴之。謫貴州布政司都事。未幾。臨清百姓變。毆稅使馬堂幾死。見捷言若左券。欽縣監生吳養晦投稅監魯保言。大父守禮通鹽課工十五萬。乞追入給占產。從之。左春坊左庶子葉向高請罷礦使。不報。大學士趙志皋病篤。特疏請停礦稅。不報。四月。河南礦監魯坤言。礦砂贏縮不一。請均派官民。從之。十月。南京守備太監郝隆。劉朝用採甯國池州等礦。戶科給事李應策、姚文蔚以播警乞停中官



礦稅不報。八月，錦衣衛總旗申敏奏湖廣與國州礦洞丹砂，命陳奉開採。逮荊州府推官華鈺，黃州府經歷車任重，降荊州知府李商耕，黃州知府趙文煒，荊門知州高則巽各一級，以稅監陳奉誣劾也。初，奉由武昌抵荊州，商民鼓譟者數千人，飛輒擊石，勢莫可禦。道府諸臣身犯其衝，彈力防護，獨華鈺以公事至夷陵，奉疑之，又惡其禁革差官冠帶，阻截可役書算，故受誣尤烈。又稅課襄陽，商人聚徒鼓譟，知府李商耕治其參隨，開鎮荊門，增設稅課，而荊門故非巨鎮，往來商船頗少，誣知州高則巽阻撓，俱降調。雲南稅監李榮虐諸生見訴，榮劾巡撫陳用賓，命下諸生於理。九月，戶部進大珠龍涎香。十月，驍騎衛百戶請徵湖廣郡縣積貯羨銀，又與國州人漆有光報徐鼎等掘古墓得黃金巨萬，命陳奉同撫按查解。十二月，命應天府取帘屏龍旂龍籬諸上供物，府丞徐申上疏言費將巨萬，弊不可言，必不得已，請增爐鼓鑄以濟急，報可。武功衛百戶韓應桂奏土民夏國瑚報湖廣京山具有真礦鉛砂大青等物，是時與國麻城開採，止得鉛砂，得不償失，即陳奉亦經營勞瘁，苦於奉行，巡撫支可大疏參應桂欺罔，請置法，上免其罪，撤回雲南道御史葉永盛奏差璫播虐，請誅首禍，不報。

二十八年春正月，武昌漢陽民千餘集撫按門，陳稅監陳奉之毒，撫按不敢理，民情益憤。貴州巡按宋興祖請停採木，專力討播。逮西安府同知宋言，稅監梁永劾其激衆倡亂也。二月己卯，命太監暨祿兼徵鳳陽、安慶、徽、廬、常、鎮、稅，前止徵應天、太平、甯國、淮揚。至是，從羽林千戶王承德、金吾百戶王鎮請也。南京守備太監邢隆稅沿江洲田。辛巳，內監魯坤開彰德、衛輝、懷慶、開封等礦洞，以武驥衛百戶張欽請也。戊子，錦衣衛百戶王體仁奏徵長江船稅，從之。三月戊申，四川貢扇不至，左布政使程正誼

等五人俱降調。庚戌。兩淮鹽務少監魯保參稅監陳增。委官程守訓假武英殿中書舍人恣虐。不報。席洋衛鎮撫戴君恩奏廣東遺鹽及名馬天鵝絨鎮伏西錦珠寶皆土產。上卽命徵收。總督戴耀極言之。不聽。四月甲申。雲南礦稅寶井內監楊榮參雲南知府蔡如川。趙州知州甘學書等。乙酉。珠池市舶稅務內監李鳳激變新會縣。因參鄉官吳應鴻等。命逮治。鳳陽巡撫李三才請停礦稅。曰。自礦稅繁興。萬民失業。陛下爲斯民主。不惟不衣之。且併其衣而奪之。不惟不食之。且併其食而奪之。征權之使。急於星火。搜括之令。密如牛毛。今日某礦得銀若干。明日又加銀若干。今日某處稅若干。明日又加稅若干。今日某官阻撓礦稅。擊解。明日某官怠玩礦稅。罷職。上下相爭。惟利是聞。如臣境內抽稅。徐州則陳增。儀真則暨祿。理鹽揚州則魯保。蘆政沿江則邢隆。千里之區。中使四布。加以無賴亡命。附翼虎狼。如中書程守訓。尤爲無忌。假旨詐財。動以萬數。昨運同陶允明自楚來云。彼中內使沿途掘墳。得財方止。聖心安乎。不安乎。且一人之心。千萬人之心也。皇上愛珠玉。人亦愛溫飽。皇上愛萬世。人亦戀妻孥。柰何皇上欲黃金。高於北斗。而不使百姓有糠粃升斗之儲。皇上欲爲子孫千萬年。而不使百姓有一朝一夕。試觀往籍。朝廷有如此政令。天下有如此景象。而不亂者。哉。不報。辛未。三才復奏數月以來。章奏但繫礦稅。卽東高閣。臣前疏非泛常。國脈民命之所關。天心祖德之所在也。人主能爲萬姓之主。然後奔走禦侮。若休戚不關。威力是憑。劫奪之已耳。斬刈之已耳。孤人之子。寡人之妻。折人之產。掘人之墓。卽在敵國。讎人猶所不忍。况吾衽席之赤子哉。窮困無聊。遂生窺竊。如徐州趙古元之類是已。夫天下非小弱也。草澤之人。至廣且衆也。欲爲古元者何限。獨以朝廷處置得宜。欲乘之而無覺。故俛首降心。從教從令耳。今乃驅之使亂。臣

懼萬姓不肯爲朝廷屈也。南京守備太監下廬州問六安州礦有無狀。知府具地圖上言六安有礦。高皇帝恐人盜採。有傷皇陵來脈。故六安衛特重巡山之任。不敢妄議開取。詔止之。六月戊戌。礦監趙欽劾富平知縣王正志。逮訊。七月。稅監王虎劾通州同知邵光庭。香河知縣焦光卿。降調。戊申。稅監陳奉許江防參政沈孟化。蘄州知州鄭夢楨。降調。戊午。巡按御史王立賢奏稅監陳奉貪暴激變。不報。時陳奉道承天之金花灘。勒居民黃金。拷及婦人。并拘鍾祥知縣鄒堯弼。遠近大震。八月。把總韓應龍奏四川成都龍安產繭茶。重慶馬湖產名木。命內監邱乘雲往徵。十二月辛丑。湖廣稅監陳奉遣荊州衛王指揮開礦穀城。不獲。責貸主簿脅庫金若干。邑人大懼。羣擊之。指揮走免。餘俱溺江中。

二十九年二月。天津稅監馬堂進大西洋利瑪竇方物。禮部言大西洋不載會典。真僞不可知。且所貢天主女圖。既屬不經。而囊有神仙骨等物。夫仙則飛昇。安得有骨。韓愈謂凶穢之餘。不宜令入宮禁。宜量給冠帶令還。勿潛住京師。不報。己丑。武昌兵備馮應京參陳奉大逆十罪。逮至京。下司理削籍。奉欲開礦。青山。棗陽知縣王之翰以近顯陵。拒之。因誣及襄陽通判邸宅。推官何棟如。俱削籍。逮下獄。之翰尋斃。三月。武昌民變。逐陳奉。奉列兵殺二人。匿楚府中。命甲騎三百餘射死數人。傷二十餘人。奉踰月不敢出。衆執奉左右六人投之江。奉自焚公署門。事聞。謫知府王禹聲。知縣鄒堯弼爲民。沈一貫論陳奉激變不報。四月。督理直隸儀真等稅御馬監暨祿言臣徵廬鳳徽。安遣稅。并沿江船稅。各撫按皆云重疊不敷。題請寬處。臣未敢憑。二項共二十萬金。今徵不滿萬。始信撫按爲口據。而原奏人無憑也。乞軫念民瘼。以實徵解上。母拘原奏人揣摩之數。上從之。時權使奇暴。獨暨祿請寬卹。凡五上。六月己巳。太監孫隆採

稅浙直駐蘇州激變市人殺其參隨黃建節等數人撫按詰亂民有葛成獨引服不及其餘下獄論死。直隸巡按御史劉曰梧行部徽州見程守訓暨坊曰特旨下書咸有一德卽收之守訓訐奏曰梧短不報。七月陝西撫按奏歲貢羊絨四千匹奉命改織盤陵又降柘黃暗花二則每匹長五丈八尺日織一寸七分半年得匹豈能如額乞悉改織不報。九月起禮部尚書沈鯉大學士入閣辦事鯉陛見具疏望上以言致治又極陳礦稅之害尋值長至節上使太監陳矩宴之語及開礦事鯉言洩山川靈氣傷陵脈關係聖躬與聖子神孫不細上領之。禮部侍郎郭正域上言世宗朝能內臣鎮守及珠池貢物擾驛濫奏帶開銀場者按問譴戍不貸備在實錄寶訓幸罷諸中使以杜亂萌不報。十月以內監魯保司兩淮鹽政兼浙直織造計專敕與關防禮部侍郎郭正域持不可往白內閣朱廣曰敕去矣敕中多勸戒語正域曰今文武臣奉敕者孰無勸戒能一一奉行否何望於閣退而具疏力爭關防得無給。

三十年二月己卯上偶不豫急召輔臣沈一貫入諭以勉輔太子併及罷礦稅起廢釋禁諸事翌日上安諸事遂寢。停稅諭已出上悔急令追之太監田義諫曰諭已頒行不可反汗上怒欲手刃義義不爲動一貫恐亟繳前諭義唾之始吏部尚書李戴左都御史溫純約卽日奉行且頒天下刑部謂弛獄須再請亡何而旨格矣。饒州景德鎮民變稅監潘相舍人激之相誣劾通判陳奇逮下獄三月雲南稅監楊榮肆虐激變滇人不勝憤火廠房殺委官張安民撫按以聞上怒持其章不下大學士沈鯉揭言定亂宜速久且生變又具列祭罪狀得毋株及五月戊辰太監劉成徵稅蘇松常鎮激變江西稅監潘相掠諸生及輔國將軍謀託各宗大闕抉門入相走免。誣劾上饒知縣李鴻報怨鴻除名禮部侍郎馮琦上言礦稅之

害。演以張安民故。火廠房矣。粵以李鳳釀禍。欲劊刃其腹矣。陝以委官迫死縣令。民洵洵不安矣。兩淮以激變地方。劫燬官舍錢糧矣。遼左以余東蕪故。碎屍抄家矣。土崩瓦解。亂在旦夕。皇上能無動心乎。不報。應天大風。拔富家樹成穴。魯保誣以盜礦。府尹徐申力白富家冤。而盛言帝京王氣不可鑿。保不能奪。九月。揚州富民吳時修獻銀十四萬兩。詔授其子弟各中書舍人。

三十一年九月。雲南稅監楊榮責麗江土官木增退地聽開採。巡按御史宋興祖上言麗江古荒服也。木氏世知府。守石門以絕西域。守鐵橋以斷土番。不宜自撤其藩。始誤封疆。不報。

三十二年三月。都御史溫造言礦稅毒虐。乞逮廣東稅使李鳳。撤陝西稅使梁永。雲南稅使楊榮。不報。

八月丙午。武驥白戶陳起鳳請採大木。以觀利除名。盡逐其黨。時大雨。都城奔壞。戶部尚書趙世卿言蒼生糜爛已極。天心示警可畏。礦稅貂璫掘墳墓。奸子女。皇上嘗曰朕心仁愛。自有停止之日。今將索元元於枯魚之肆矣。不報。九月戊申。翰林檢討蔡毅中上皇明祖訓。節略內關礦稅者。爲註疏二十二卷。不報。

三十三年春正月壬辰。廣東撫按戴耀。林秉漢奏稅監李鳳憾潮州推官姚會嘉。慙辱於廣州。不報。二月丙午。巡按廣西楊芳。言稅監沈永壽。以土產金銀錫。派有司包解永康。思恩等州。原無礦洞。亦派多金。宜免。不報。八月。禮部侍郎馮琦。上言礦使出。而天下苦更甚於兵。稅使出。而天下苦更甚於礦。皇上欲通商。而彼專欲困商。皇上欲愛民。而彼必欲害民。皇上戒以勿信撥置。而撥置愈多。皇上責以不許釋騷。而釋騷更甚。皇上之心。但欲裕國。不欲病民。羣小之心。必自瘠民。方能肥己。疏留中。十二月壬寅。詔

罷採礦。以稅務歸有司。釋礦稅在獄承天諸生沈機等十二人。

三十四年春正月癸巳。逮咸陽知縣宋時隆下獄。時命停礦。稅監梁永堅執咸陽。潼關委官不宜罷。益樹黨布虐。巡撫顧其志捕惡黨置之。永大恨之。永又檄時隆取絨氈千五百。時隆不予。遂誣時隆劫稅。閣臣揭沮不報。二月己未。南京內官監丞徐壽僞造印牒。稱中旨徵南工部杉枋三千部。報詳詐窮。下守備太監劉朝用訊之。三月己卯。大學士沈鯉。朱廣言。秦人恨梁永甚。宜撤不報。乙亥。江西礦務太監潘相以停稅。移景德鎮。請專陶從之。丁丑。仍以江西湖口稅務歸稅監李道。己卯。雲南礦務太監楊榮被殺。榮久於滇。恣行威福。杖斃數千人。榜掠指揮樊高明等。盡捕六衛官。人人自危。指揮賀世勳。韓光大。遂倡衆焚其署。徙黨輜重皆燼。事聞。上怒不食。曰。榮不足惜。何紀綱頓至此。罪其首事。罷中使不遣。以稅課歸四川稅使邱乘雲。世勳下獄死。光大戍邊。五月。巡撫鳳陽李三才言。恩詔中格。流傳二說。一新政原非聖意。故旋開旋閉。一沈一貫。恐沈鯉。朱廣妨位。恥事不出己計。傾左右。致善事不終。上怒。奪俸三月。一貫奏辯不問。

三十五年七月壬辰。撤陝西稅監梁永還京。初。巡按陝西御史王基洪劾稅監梁永陳兵殺傷吏民。巡撫顧其志奏至。平甚。上疑之。梁永遂許奏咸陽知縣滿朝薦承御史意。伏兵渭南劫貢。上怒。命逮朝薦。廷臣論救不聽。時緹騎止灞上。宗室士民毋慮數萬人。圍永署。朝薦間道就檻車。藍田知縣王邦才亦發奸劾。盡與永相左。并爲永誣逮。至是。中旨撤永還。十一月。巡撫福建徐學聚。戶科給事中江灞劾稅監高窠不法。不報。初。窠肆虐閩中。舊撫袁一驥捕其爪牙置之法。窠造樓船餘艘。治戎器。招集亡命。徵集百貨。將

出與諸番市。閩人集其門詬之。築所殺傷百餘人。焚民居無算。一驥力輯之乃定。已又招紅裔入市。殺僂商漁。漸窺內地。故學聚奏之。

三十六年五月甲寅。遼東稅監高淮激變錦州。淮恃寵恣橫。吏民小拂意。父子老弱係累相屬於道。徵稅私賦倍之。每開市。奪其善馬。竊者強勒堡軍。以重價購償。自疏調度兵將。翊其功伐。總督蹇達劾奏。內臣不得豫政典兵。不報。至是。索賄錦州軍戶。軍戶殺其使。激衆千人圍之。淮倉皇逃入山海關。吏部左侍郎楊時喬。戎政尙書李化龍。力言遼東重困。危在旦夕。皆高淮擾民激變。以資禍患。上命撤淮還京。

四十一年六月初。廣東珠池自萬歷三十二年停採。至是。金吾右衛指揮倪英。上章請開。刑科給事中郭尙賓論開採之害。不報。

四十二年二月。命各省稅課減三分之一。

四十三年八月。命內官呂貴。暫提督浙江織造。江西稅監潘相。檄催福建、廣東稅課。關臣言之不聽。九月丁丑。江西湖口稅腐火。大學士吳道南。請罷湖口商稅。不報。

四十四年四月丙午。雷火焚通州稅監張燁樓居。御史金汝諧以聞。請罷稅使。不報。八月。萬壽節。加稅監河南胡江。江西潘相。通灣張燁。天津馬堂。四川邱乘雲。南京劉朝用。歲祿。賜呂貴飛魚服。

四十七年五月。吏部候選儒士蔣定國。奏採山西夏縣等礦。疏不由通政司。通政使姚思仁糾之。時遼東三路敗。兵餉告急。獻人曹致廉等。奏乞同內監搜江南富家。借餉數百萬。思仁復疏爭之。

四十八年七月。上崩。遺詔罷一切礦稅。并新增織造燒造等項。建言廢棄及礦稅註誤諸臣。酌量起用。奉

皇太子令旨盡行停止。稅監張燁、馬堂、胡濱、潘相、邱乘雲等撤還京。

谷應泰曰：聞之無鑿。品列之禹貢，甘人璣貝，載在周禮。國有常經，非可以無藝征之也。况王者藏富於閭閻，天子不下求金匱。良以多慾者仁義難施，璫貨者亂源斯伏。有天下者，不可以不致謹也。神宗奕葉昇平，邊圉封貢，海內乂安，家給人足，而乃苞桑之憂，不繫於慮。日中之昃，弗虞於懷。遠賢士大夫，親宦官宮妾，女謁苞苴，陰性吝嗇，孽孽所談，利之所萌，且逮至萬歷二十四年，張位主謀，仲春建策，而礦稅始起。於是命張忠往山西，曹金往兩浙，趙欽往陝西，陳增駐山東，高棗領福建，楊榮辦雲南，邱乘雲駐四川，李敬徽廣東，郝隆、劉朝用采池州，陳奉領湖廣，魯坤開彰德，衛輝、大璫雜出，諸道紛然，而民生其間，富者編爲礦頭，貧者驅之墾采，繹騷凋敝，若草菅然，又不特此也。礦務之外，天津有店租，廣州有珠權，兩淮有餘鹽，京口有供用，浙江有市舶，咸都有曬茶，重慶有名木，湖口長江有船稅，荊州有店稅，又有門攤商稅，油布雜稅，莫不設璫分職，橫肆誅求，有司得罪，立繫檻車，百姓奉行，若驅駝馬，雖漢室牢盆，桑孔乘傳，熙豐手實，豚豚悉空，曾未若斯之酷也。至乃國法恣睢，人懷痛憤，反爾之誠，覆舟之禍，亦間有之。以故高淮激變遼東，梁永激變陝西，陳奉激變江夏，李鳳激變新會，孫隆激變蘇州，楊榮激變雲南，劉成激變常鎮，潘相激變江西，當時也。瓦解土崩，民流政散，其不亡者幸耳，而深宮不省，疏入留中，其始因礦稅而設璫者，繼則璫熒而託命在礦稅，其始因璫媚而迎合在礦稅者，繼則璫肥而交結在宮闈，植根深固，未易卒拔故也。善乎侍郎馮琦之疏曰：皇上之心，但欲裕國，不欲病民，羣小之心，必自瘠民，方能肥己。逮至三十年，而稅歸有司，礦使停罷，輪臺之悔，不亦晚乎！然且兩載以還，稅監不革，七年之後，珠池復開，比之衛



明史紀事本末 九 卷六十五

武飲酒之悔。秦穆臨河之誓。抑何習與性成也。